

良鄉縣志卷之八

藝文志 書 議 傳 記 碑文

致飾則亨盡而受之以剝先聖於文慎矣哉然義繩以前已飛浩唱媯簧而後益
揆奧詞者何歟易曰觀乎人文以化成天下禮曰命太史陳詩以觀民風則志終
藝文斷可識已

書

報燕惠王書

樂毅

臣不佞不能奉承王命以順左右之心恐傷先王之明有害足下之義故逃遁走趙
今足下使人數之以罪臣恐侍御者不察先王所以畜幸臣之理又不自臣之所以
事先王之心故敢以書對臣聞賢聖之君不以祿私親其功多者賞之其能當者處
之故察能而授官者成功之君也論行而結交者立名之士也臣觀先王之舉也見
有高世主之心故假節于魏以身得察于燕先王過舉廁之賓客之中立之羣臣之

良鄉縣志

卷八藝文志 書

三一

上不謀父兄以為亞卿臣竊不自知自以為奉令承教可幸無罪故受令而不辭先
王命之曰我有積怨深怒于齊不量輕弱而欲以齊為事臣曰夫齊霸國之餘業而
雅勝之遺事也練於甲兵習于戰攻王若欲伐之必與天下圖之與天下圖之莫若
結於趙且又淮北宋地楚衛之所欲也趙若許而約四國攻之齊可大破也先王以
為然具符節南使臣於趙比反命起兵擊齊以天之道先王之靈河北之地隨先王
而舉之濟上濟上之軍受命擊齊大敗齊人輕卒銳兵長驅入國齊王遁而走莒僅
以身免珠玉財寶車甲珍器盡收入於燕齊器設于甯臺大呂陳於元英故鼎反乎
磨室薊邱之植植於汶篁自五霸以來功未有及先王者也先王以為嫌於志故裂
地而封之使得比小國諸侯臣竊不自知自以為奉命承教可幸無罪是以受命不
辭臣聞賢聖之君功立而不廢故著于春秋蚤知之士名成而不毀故稱于後世若
先王之報怨雪恥平萬乘之疆國收八百歲之積蓄及至棄羣臣之日餘教未衰執
政任事之臣修法令慎庶孽施及乎萌隸皆可以教後世臣聞之善作者不必善成
善始者不必善終昔伍子胥說聽于闔閭而吳王遠迹至郢夫差弗是也賜之鴟夷

而浮之江吳王不悟先論之可以立功故沉子胥而不悔子胥不早見主之不同量是以至于人江而不化夫免身立功以明先王之迹臣之上計也離毀辱之誹謗墮先王之名臣之所大怨也臨不測之罪以幸爲利義之所不敢出也臣聞古之君子交絕不出惡聲忠臣去國不潔其名雖不佞數奉教於君子矣恐侍御者之親左右之說不察疏遠之行故敢獻書以聞惟君王之留意焉

與司空羅公書

邑人張環

雲司共事獲益孔多爲德爲民素懷霄鑒邇者楚省廢藩宮殿因材堪梁棟木中準繩勒期運京原未擇其水與陸也今奉行不善盛暑農忙驅民肩運聯袂揮汗饑渴難堪兼以擁擠賤踏民殆不堪命焉更苦者往常接替待城今番接替在鄉往來更換之間六七日一次大木用夫百二名小木用夫六十名僱夫一日每名用銀二錢五分以六日計之須費兩半矣且夫少木多非百姓所能徧給也以愚見揆之不善有五善亦有五併爲臚列惟執事急擇之一邪澍強呼之不善也軒轅製車取其負重致遠不徙貴人踐畜抑謂人弱畜強若一車載二木則三畜可代三百夫之勞其

良鄉縣志

卷八藝文志 書 議

三三一

善一一拖泥帶水之不善也衆肩負木距地不過二尺途多泥濘陷足難行何如輪轆高架三倍於斯之爲愈乎其善二一累足難行之不善也委官長解一木必用百二之夫一夫足立尺地左右各夫六十並無六丈之地可受重疊稠密跬步難前不若車可長索前引也其善三一夫衆妨農之不善也夏耘秋收爲務正殷役夫千百成羣日荒如許之田若用百輛之車可省三萬之衆其善四一費多銷算之不善也一木用銀百八十兩百木用銀將萬八千兩矣銷算過浮竊恐難以奏聞誠僱車一車六七錢足用卽驛所錢糧亦可促辦其善五不佞見聞既真不敢緘默漢堂面議咸謂用車爲便惟候執事裁之

時漢司空朱公號右君杜公號振門楊公號雲嵐司陸公號吳州

議

民瘼議

蘇之屏

從來民瘼關乎國計就今日之民瘼今民所處之時勢而備書之良鄉以彈丸小邑爲京師屏翰萬國咽喉自明季以來地瘠民貧莫此爲甚諸蒞茲土者無不鰓鰓焉

憂兢兢然慮也嗣後疊遭兵燹生民凋瘵載在冊籍者民不過八百丁驛地梗塞縣治幾廢矣故前令持疏奏請嚴催協濟車馬官吏寥寥子遺不過僅延殘喘而已自我朝定鼎以滿漢不便雜居被圈民地撥補定州以輸國課以裕民生其爲百姓計周且詳也况休養幾三十年宜乎生齒日繁也俯仰有資也室家保聚父母妻孥之慶樂也何爲不其然也是豈法之不善與乃法行而弊滋奉法者之不善也何也民以地爲根本自宜隨地而居何以在定者少而在良者多也說者曰一則爲本縣差徭路途阻隔應當不便也一則爲祖宗墳墓別離不忍也一則爲地之零星沙薄室廬全無耕種爲難也於是向定民取租以供國課情理亦似相通不知往返途長盤費不貲定民且未必應手而與也延遲日久地租未全而耗費將盡矣空拳回里又懼催科限嚴沿門稱貸或典妻鬻子賣身旗下比比也詩曰醫得眼前瘡剜卻心頭肉殆良民之瘼乎幸而窮則思變良定爭訟盈庭上臺久壓惡之因俯允良民之控訴立爲永遠之規則以定州絕地租銀徵作良民賦稅官取官解美意良法孰善于此是又良民之出萬死而獲一生也至于丁則更有難焉矣冊上空名雖有二千餘

良鄉縣志

卷八藝文志 議傳

三三二

數除老弱殘疲精壯者不過數百名耳衙役吏書壯快等占用實多而衙役之苦又不堪言矣日行差使紛紜絡繹卽官親身應付衙役傳催少延時刻官長遭其辱詈胥役被其鞭笞矣且借端需索恐小人之腹難饜也甚至解京銀糧晝則查看夜則巡警官長且寢食俱廢矣又何有于衙役乎更可憂者起解逃人盜賊等事關繫重大常遇衙門公務旁午數日不得投文本身工食有幾盤費其從何辦乎其餘老弱殘丁或傭工以養身或買賣以糊口或賃居街市或散處滿屯遷徙無常定居無所諸如運水修橋大夫大役能一呼而卽應乎甚有一丁逃避累及里老害及宗族者矣古云鳥驚則飛魚驚則散良民之謂乎予惟目繫艱難甘苦與共痛癢相關故洞曉吾良之民瘼熟觀時事之沉疴舉筆而直書焉儻軫念民艱就目前顛連之形建百年長久之策以造福於良邑予其引領望之矣

傳

張金吾樂菴張鴻臚和菴兩公合傳

莊應會 獨 藩

初近臺公娶於陳多男子其仲任金吾諱鑽樂菴其別號也既長惻惻沈勇補黑衣衛東宮時寵王未就藩母妃之宗戚貴游潛有奪嫡之萌一日壯士杖挺排闥而入意犯東宮衆皆駭愕不知所爲金吾奮臂格執之錄功進錦衣衛昭信校尉母弟諱鎔號和菴美丰容談論驚四筵自王公至韋布爭得納交焉宅近長安九州冠蓋過而問者卽投轄開閣緇衣瓊玖不一而足殆終身如一日嗟嗟劇孟鄭莊者流也世之玉帛驕人與怯慙首鼠厭覈隱聞寶力不能定天下之業俠不足迴長者之車其可一二更僕獨安得納此鉗錘拔毛髮哉陳氏之元季二公有焉

楊母王孺人傳

郭秉聰 右通政

王孺人者興州衛邑族也世居良鄉之七里店幼端淑聞忠孝節義事心切効慕長適雪堂楊公脫簪珥爲遊學費事舅姑恭謹處妯娌和睦撫族遺孤如子嫻戚貧乏必曲爲周給天性儉朴服飾不事華麗雪堂公登進士第官行人諫止武廟巡遊廷杖左遷孺人曰此臣道也及雪堂公爲侍御每有章奏必極力贊成嘉靖元年被登極恩詔封孺人雪堂公繼僉蜀泉以年荒賑饑過於勞瘁遂卒于官旅魂寂寞行李

良鄉縣志

卷八 藝文志 傳

三四

蕭條歸鄉教子以篤志紹芳爲勗伯仲叔三子俱膺歲薦責以勤廉服官恪遵庭訓故所至悉著循良聲季子及諸孫務學明農克繼先業越三年己巳孺人壽躋九袞神氣清爽步履康健四子八孫六曾一元諷日張筵設樂遶膝戲綵親賓咸集邑之令博州之武帥皆曰此盛世人瑞也錦軸瑤章登堂獻爵爲儒人壽宗黨稱榮焉夫孺人以茂德享遐齡而胤嗣之盛爵祿之隆皆世所罕覩可以範俗垂休矣此邦家之光非一門之榮也余有感焉乃爲之傳

張贈君哲吾公傳

莊應會

公爲次菴公冢嗣恫先人早世未竟其用途領家督祖宗之堂構惴惴承之內聯族姓外繼交遊雖門如萬石終不敢登枝捐本問耕於奴問織於婢無昕夕黽勉求之大小勿慢胤益蕃費益滋勤益甚奉以不假之天年不匱之民生約其居處周于故舊僂俯循墻或敢侮予孝友夙成事諸父接昆弟雍熙之軌太邱家範亦若是已矣歷敦義共釜爨迄公指盈千羣從勸之析公悽然曰讓梨共被爲日久矣吾家累世同居者唐宋美談及余身而鮮令德爲父兄伯季憂其何以對先人強而後可度室

數區皆心計目營更諸爽塏榭榭終不異巷寸木塊石一如堅緻羣享其逸獨任其
劬室中器用財賂各適所欲自取苦窳焉宜無間然矣歲饑三輔洶洶殍者相藉也
顧蓄積於物絕意贏糶大賑于國昕日作粥百斛凡五六月不聞嗟來之呼蒙袂蟻
附先是民已傷驟得甘糜如啖梁肉有斃於箸下者輒葦席以瘞所全活不可億計
當事褒異表其庭瞿然勿居也甘泉烽火議兵議餉縣宰束手徬徨公投袂曰吾公
執干戈以衛社稷與子同仇義也而嗾者不可以報國即運米千石芻萬束矻矻
于城良實賴之性雅讓時衡宇贈君方稱間諸急公好義必以名歸之人孚其厚游
辟雍四十年出入慎飭造次必於儒者既老事從父如父母贈君宴客夜中伺其寢
迺即安甚寒暑不易燕居危坐如對大賓口未嘗臧否人物中清外和吐茹勸懲闔
無捍格有竊爲刑罰所加毋爲陳君所短之化云

成實徵先生傳

郝錫疇

鄉黨中有嘉言懿行堪爲坊表者人人皆樂道之顧道於一時不如傳於後世也邑
之南拜村有武庠生成實徵先生者名得名一鄉善士也秉心仁厚尤善事親其能

良鄉縣志

卷八藝文志 傳

三五

得親心每藉籍於宗族之口夫安常處順奉養無難惟至久病則人子之心有時而
間矣先生不然嚴親在世嘗臥病數年實徵先生衣不解帶煎藥調羹必身親其事
數年之中有戚容絕無倦容嘗曰人之有子爲養老也嚴親沒後惟母命是從先生
有二姊皆先富後貧母深以爲憂先生仰承母意爲之置田產謀生計家皆至小康
二姊沒先生又撫恤諸甥爲之婚嫁其克慰母心有如此者先生世爲農家生平以
農爲務凡耕耘收穫其事無一不精春夏之時效田家之作苦年雖老而精力不衰
至和睦鄉黨尤能爲人所不能爲蓋以至誠相與無不感服也尤可述者同治十年
河伯爲災一村之中房屋傾頽棲身無所米麥漂沒餬口無資男女百餘口先生皆
招致於家妥爲安置而家鮮素儲無以爲養出新穀之未熟者爲食以救百餘人之
性命越數十日水勢漸退始令各歸其家及其終也一村男女老幼皆撫棺痛哭不
自覺涕零之如雨其盛德之感人深矣鄉人述先生之行狀如此余適秉筆志館記
其事

記

寶燕山陰德記

寶公禹鈞燕山其字也爲右諫議大夫諸子登進士第義風家法爲一時標表瀛海王馮道贈詩云燕山寶十郎教子有義方靈椿一株老丹桂五枝芳公生五子長曰儀次儼次侃次稱次僖儀至禮部侍郎儼爲翰林學士侃右補闕稱右諫議大夫參知政事僖爲起居郎初公三十無子夜夢亡祖亡父謂之曰汝命無子壽亦不永宜早修行公曰諾公爲人素長者先有家僕盜用庫錢二百緡僕慮事覺有女十餘歲自寫一券繫臂上云求賣此女以償所負自是遠逃公見女券甚憐之卽焚券歸女囑其妻善視之及女及笄又以錢二百緡擇良配嫁之僕後聞之歸感泣訴前罪公弗問也父女圖禹鈞像朝夕以祝公壽又嘗於延壽寺得黃白金若干兩持歸明日詣寺候失物主須臾一人哭至公問所因乃失金告曰吾父犯死罪徧至親戚處貸得金銀若干將以贖罪昨以相知治酒昏忽失去父罪不能贖矣公遂與之且加贈焉其同宗及外戚甚多貧者有喪不能葬公出金以葬之凡二十七人有女未能嫁公爲出金以嫁之凡二十八人或與公有一面之交見其困窘則擇其子弟可委者

良鄉縣志

卷八藝文志 記

二六

與之金帛使之興販自給由公而活者數百家四方賴而舉火者不可勝數每計歲之入除自奉外盡以濟人居惟以儉素自守器無金玉之飾家無衣帛之妾於宅南建一書院四五十間買書數千卷禮文行之士主師席凡有志於學者聽其自至四方之士由公門登仕籍不可屈指及公歿人多持心喪以報公德先是公復夢亡父語曰吾前言汝無子壽短促今汝數十年修行名挂天曹延壽三紀身尊名顯子孫榮耀陰功之理善惡之報果不誣也公由是益修行享年八十二歲沐浴別親戚無疾而終五子八孫皆通顯

重修良鄉縣學宮記

知良鄉縣事 彭世昌

昔先王順人情以立教知夫人情所不習則不能責其器之備而業之精于是廣立學宮制之禮器使人日遊于橋門璧水之間俎豆干羽之地濡染其耳目陶養其性情久則天機與器數相習而不自知故終身安焉而不願乎外上之人九年以攷其成四十而試之仕而士亦因之自勵故其器之備也自簡廉直溫剛寒恭愿以及中和孝友皆能盡其微妙而無有羸疎傲戾之氣其業之精也自唐虞三代以下之典

章鞮譯象寄之語言以及射御操縵雜服之技凡可爲國家天下用者皆能貫而通之而無鹵莽生澀之弊伊古以來學校興則人文盛學校廢則人文衰如影響焉莫之爽也我國家稽古右文崇儒講學今將二百年矣海隅之內罔不宮牆相望絃誦相聞傑士才人不擇地而有矧其在輦轂之近哉良鄉首善要地距京師六十里許近天子之光沐聖人之教無甚於此者宜才人傑士接踵而生器無不備業無不精奮風雲光史策有倍于荒甸外者顧數十年來聲稱寂若科第蔑如嗚呼詎非以學校荒圯久而不治之故與夫學校荒圯有司之責亦紳耆之羞也而爲良邑之有司紳耆抑獨有甚苦焉蓋幅員不及百里戶口不及數千土田磽瘠大半皆爲旗產故居民無土著一鄉之中求所謂中人之產者十不得一二士皆環堵蕭然宿春不具學校荒圯有蒿目焉而無可爲力者且邑當孔道車書輻輳星使犇馳有司治事外持手版迎謁道周而芻茭酒食踟躕橫索之音日填于耳雖有長才供帳應酬之不暇學校之不治所以恒不暇爲也壬辰歲杪余奉特旨來蒞茲土下車謁廟心竊傷之會以歲饑不克卽謀修葺逾年天又降災大水漂蕩民舍而官廨亦爲

良鄉縣志

卷八藝文志 記

二七

之空徙寓僧廬辦公無所勢又不得不急營焉乃白之大吏請於朝給發帑金八閱月而後官廨告成事于是得與胡李兩廣文大召生徒共商斯舉余與兩廣文先割薄俸以爲之倡都人士亦皆踴躍輸將繼乎其後銖積寸累共得緡若干鳩工庀材擇茂才數人董其事經始于丙申二月告成于本年月日泮池兩廡大成櫺星之門鄉賢名宦之祠以及禮門義路次第畢舉煥然改觀向之隘者今加敞向之卑者今加崇向之樸者今加飾向之無者今加增而且丹其薨楹飾其戶牖几筵鐘鼓粲然具陳庶幾春秋釋奠濟濟踴踴睹美富之宏規作身心之嚴翼此一役也以彫敝之鄉興久墜之業始頗虞其難繼甚樂其易是知人情皆善聖賢之在人心無敢忽也是亦一陽來復文明之一大轉機也安知才人傑士不自此接踵而生器無不備業無不精奮風雲光史策有大副乎國家稽古右文崇儒講學之化者則興廢舉墜所關詎淺鮮哉雖然猶有憾明倫之堂師儒所以出教也尊經之閣生徒所以稽古也維時缺於貲而未遑及異日廉俸稍餘當與諸君子共竟斯業庶免不全不備之憾與

神槐記

前明進士楊守公八十二歲

東嶽廟之在舊店其創建之顛末予已記之於石矣神前有古槐一株可合三人之抱盤踞得地挺挺孤高凋謝鶯花奚止百歲哉迨夏盛暑其枝葉覆蔭盈滿院宇遠觀之儼然一槐亭也鄉人以神槐稱之余謂神依於樹樹以神靈而地之靈從可知矣予嘗遊蜀謁孔明廟廟中古柏霜皮溜雨黛色參天杜少陵題以詩曰扶持自是神明力正直元因造化功斯槐也殆不減於蜀之古柏矣余可無記乎歲丙戌夏日余游息於槐下細觀神前一枝葉大於几上產靈芝紫色堅實其雲如蓋神之靈固有驗哉道人姓劉道號烟霞晨昏香火於茲三十餘年性頗沈靜外貌若愚中實凜凜謹飭出於凡流且素明修養術精透機關愛惜斯槐甚於肌膚由是悠悠塵世永為地仙殆與斯槐同悠久也是為記萬歷四十一年

劉孟純縣長暢園記

舉人呂植

為民上者苟繫念民生雖一遊一豫之間亦能溥惠澤於羣黎而德政流傳於後世故遊觀之地非僅為玩物適情也劉孟純先生子達福建閩侯人於己未七月來宰

良鄉縣志

卷八藝文志 記

三八

吾良下車之日即問民之疾苦凡有利於民者急為興之凡有害於民者急為去之然吾記先生之園不暇縷述德政也縣署東偏為固節驛之舊址闢其地以為園而名曰暢園鑿池種樹結茅亭於高阜而列坐其間西望大房則層巒入畫東臨古塔則七級凌空時而春也則花香鳥語時而夏也則美陰清風於秋則紅葉凝霜於冬則青松耐冷天然佳景不藉點綴之工然命曰暢園意不在此也有休養萬民之意使各暢其生機有培養萬物之心使各暢其生趣此則命名之本意也如謂茂林修竹一觴一詠足以暢敘幽情以此解暢則誤矣先生所種之樹即召伯之甘棠過數十年猶將思其德而愛其樹如以此園比愚溪之島鉗鐻之邱黃岡之竹樓扶風之喜雨為公餘休息之所與眾賓飲酒賦詩謂為文人之韻事猶淺之乎測先生也庚申秋七月謹記

碑文

良鄉縣創修城隍廟碑 景泰七年

失名

順天府所隸縣曰良鄉去京師西南七十里爲萬方朝會陸道輻輳之衝煩且劇視他縣倍蓰縣西南隅舊有城隍廟在焉景泰二年因始築城而廟乃隔於城之外縣大夫及民庶有事廟下者咸謂不便且地勢庫隘棟宇傾頽所以妥奉神靈者亦弗稱焉諸官僚酌應紛紜殆無虛日雖欲修葺移徙莫或遑也潯陽鄭公智來爲主簿焦神勞力以佐庶務方欲銳然經理深慮勞民費財乃謀於知縣賈禔縣丞馬驥李謙典史陳永通曰竊聞政之體在治民事神而已吾儕神所當事者莫要於城隍凡祀社稷山川雷雨皆以城隍爲配水旱疾疫禱禳皆以城隍爲先而其廟值於城之外無乃不可乎賈公然之馬李諸公佐之爰擇地於城內之乾隅袤廣計之總若干尋丈先捐已俸爲之倡好善樂施者翕然傾助遂市材取曠召匠僦傭建正殿寢殿翼兩廡外爲重門以顯巍翼凡二十有六神之像設雕塑藻繪煥然聿新他若周垣修術器物之需罔不畢備興役於景泰六年二月二十五日而以七年九月望日收工始終効勞蓋主簿公居多而厥配王氏亦脫簪珥於廟左右建九天衛房聖母及蚺蚘神堂各一縣之耆老吏民僉謂廟之凋敝已甚而鼎新實肇於今匪礪石登載

良鄉縣志

卷八 藝文志 碑文

三九

何以垂示來者乃請余爲之記余惟自昔建郡邑者必依險以爲固地之險山川邱陵是也故或因山與邱陵以爲城若平地則壘土築城以擬乎山之險焉或因川以爲隍若燥地則掘土浚隍以擬乎川之險焉余閒嘗考之禮經無祀城隍之文然古者山林川澤邱陵墳衍防庸莫不載諸祀典況乎高城深隍以捍寇敵以衛人民其功甚大而可弗祀之哉今郡縣各有城隍廟是卽所謂禮雖先王未之有而有以義起之者也廟在良鄉者適當仍歲水旱之餘帑藏空虛之日而能大其規制役不勞民則鄭公有爲之才過於人也概可見矣庸次第書之俾刻石昭示焉施錢與助者之名氏具列於石陰茲不贅

重修良鄉縣署碑 正德元年立

劉武臣撰 刑部主事

良鄉古燕中都地今爲畿輔第一劇縣路控東西南三方內外大小臣工之宣納詔令者稟承職事者朝者賀者往返必信宿焉將迎無虛日令以下若丞若簿若典史皆分屬諸路以候及暮始歸秉燭視事無幾文移山積於前命吏抽檢取其利害之尤切且近者料理而已帑藏竭於供餽車徒困於奔馳民不能支至轉徙他郡若是

者皆不暇問也而況于縣署乎良鄉縣署正統中前令王君實建之迄今餘六十寒暑日就敝陋令于茲者非不欲新之也皆坐劇不能耳孟君德厚以鄉進士來令茲縣歎曰此亦天子輦轂之下而縣署乃爾豈所以壯京師示多方哉雖然當先其急者遂銳然抑豪強去奸宄祛弊蠹雪冤滯賑窮乏未幾竭者足困者起轉徙者還四境之內協然大治乃撤縣署而新之自瓦磚鍛礪以及竹木凡營構所需者如取諸左右然羣匠皆駭愕相顧以爲異蓋君自履任來已屬心於此官府有羨輒儲之而人不及知也工凡九閱月而完總若干楹宇其高翼翼其整炳炳其黝聖加於舊規信數倍不啻矣始縣署之未新也士民懼其將厲矣頗以爲念至是懼甚益德君謀勒石圖不朽且以爲將來者勸

新建琉璃河橋碑 嘉靖年立

前明工部尙書雷禮

良鄉縣迤南四十里村名劉李其地窪下爲積流所滯有河一道志稱琉璃卽古聖水自房山縣龍泉峪諸泉會合於此經霸州東注拒馬河入海時逢淫潦散漫奔潰百餘里凡陸輓跣馳者動阻滯不能涉甚或四方驛驂坐視愆期嘉靖乙亥皇上駕

良鄉縣志

卷八藝文志 碑文

四〇

幸承天覩民艱涉惻然憫之比鑿回勅工部尙書臣甘爲霖督修爲霖以病去不終其事越歲乙巳復命侍郎臣楊麒內官監太監臣陳準袁亨建石橋普濟各以績敘然無隄捍禦每遇溽暑水發環橋南北盡爲巨河難以越渡往來病是者又越八年矣會辛酉仲冬事聞蒙諭尙書徐杲曰良鄉河橋屢勅大臣督理水勢屢漲未見東下茲降帑銀八萬兩爾總理之勿令外知恐民費財也杲受命相度建議修築二隄專用條石中添小橋一座并設水溝以殺水勢其各丈尺數目畫圖貼說以進臣杲曰皇上體上天大德利濟元元吾輩職司橋梁道路不能先事弭患致屢聖懷責實難辭況部庫所儲分毫皆皇上財也敢煩帑藏具疏請任事荷旨俞允於是委郎中臣王尙直員外郎臣魯一經同內官監太監臣楊用分理其規畫悉臣杲所定凡爲隄南北東西共長五百餘丈橋一座長四丈五寸闊三丈五尺高一丈三尺五寸水溝八道又親飭欽立元恩咸濟坊凡二座至壬戌孟冬報成上遣臣徐杲懸匾祭謝差溥賚有差於是臣杲立石屬臣禮頌述聖德垂示永久竊維萬古稱盛治莫過於堯舜史臣稱其仁如天其德好生者以心存溥濟不忍一夫一區咨墊而已而橋梁

道路尤爲王政所急今我皇福民利濟常存心於天下至誠懇切如元德包涵故一聞民之病涉有如己實溺之不容以自己者其所以發帑藏普福祿不欲勞民費財眞昭格乎窮昊之表與堯舜同一接矣卽今石隄延袤與橋相連縈若橫帶使萬國輻輳而至澤及商旅農忙相與歌忭於途謳溢於野不與平成之績萬世同其燁煌耶是役也臣禮不過祇奉德意率舉職事諸臣杲之調度區畫實能爲九重分憂播之無疆不徒隨事效能而已因記其顛末以告來者

創修良鄉縣西門甕城碑

萬曆年立

楊守魯

良邑舊無城隆慶初貴陽安邑侯始城之城有四門皆設重關以爲固故必有甕城焉方城之時東南北三門皆完西門獨缺垂二十年濟陽王公至始完之公以才能自香河移治茲邑務在修廢蠲弊與民更始嘗巡城至西方凭堞顧瞻者久之乃外指山原而詢父老曰山水時漲此門得無患乎對曰水至則灌溢而入君侯之牀還顧城中而謂父老曰是門也於縣治察院獨不邇乎匪直虞心庫獄卽賓至而徵關尹其何說之詞彼大者且城矣奚爲獨弗竟此也父老曰南東二關冠蓋必出之途

良鄉縣志

卷八藝文志 碑文

四一

飾之以爲觀美而加以將迎脯資之勤則足以道譴訶而冀有譽斯固非所及者公太息曰非我其誰完此吾捐俸以爲資僚屬效力庶幾其辦之哉爰鳩工庀材授二尹張君以素而使董其役畚揭方具士民爭相謂曰吾父母獨爲邑完西門微獨嚴於縣治而防水衝吾儕亦可以安枕矣民競釋耒鋤而赴工學士大夫咸遣丁壯從事縣著姓之尙義者更饒出夫至數十百名公悉勞來之乃爲戒於衆曰若獨無私事乎吾不忍久以吾事勞爾也戶出役三日卽休無復更事勤苦民笑相語曰爲吾良完城而侯自以爲事可謂無間形骸於我也何忍輟此而去於是至者日益衆張君戴星出入勞苦於版榦之間登登馮馮甫閱月而工告訖矣墉厚二丈八尺高三丈六尺袤三十餘丈鍵闔雉堞咸具煥然甲於他門而爲完城焉公名道定字懷田濟陽人張君名滾字蒙泉亦山東人

勅賜萬壽禪院碑記

明 袁中道 賜進士第

國朝定鼎燕都天下皆輻輳而走金臺之下其喉舌之最要者無如良鄉良鄉南二十里有地名寶店一名舊店南有萬壽禪院其後枕房山烟雲層疊極爲秀媚而其

前爲走神京孔道日夜輪蹄鼎沸汗雨袂帷凡過此者皆得沾甘露醍醐之味而其
中殿堂樓閣涼軒燠室叢林所宜有者無不具備問誰爲檀主則大明侍中楊西山
居士是也居士宿植善因不昧沙劫普渡之願雖處膏脂之中而其本人戒修精進
沙門有不及者自念六度檀度爲先遂捐資締造且舉上方所資並宮禁所施者合
而營之一櫪一枅一畦一徑一草一木皆其心畫手揮無不精析夫世之行檀者有
及一人數人者矣有及一村者矣有及一邑者矣有及一國者矣有半天下者矣今
此地爲五方之大輻輳灌注而入神京則已盡乎天下以盡天下之往來者而皆受
居士之檀則居士之功德可勝言哉經言以一杯水濟人渴者生三管筌篥天歡樂
無量况檀之具至豐檀之人至博其時最久而行檀者皈依佛乘德瓶不壞此雙足
二巖之因非人天小果可望乎功德故曰不可勝言也往余讀白樂天詩見其中有
紅塵鬧熱白雲冷冷熱中間安置身之句今觀此地後睇烟巒卽南山悠悠之雲也
前當莊達卽西京皓皓之塵也見悠悠之雲則思出世而發其清虛之機見皓皓之
塵則思入世而興濟度之願清虛之機發卽文殊之理所起也濟度之願興卽普賢

良鄉縣志

卷八藝文志 碑文

四二一

之事所由成也萬用齊彰則創此者居此者不惟置其身於紅塵白雲之間而且置
其心於理事無礙之鄉矣悟此道者古有王侍中矣今日將無再見斯人乎居士構
成之後有眞實修行者遞主之是地也雖千古常存可也且我大明建都居大海
之北控制華夷襟帶山河其形勝非曩代所能及聖宇神洲相綿且億萬世惟國祚
無窮則輻輳此地者亦無窮輻輳此地者無窮則此精舍中布施其功德亦與之無
窮况過此者受應時之檀則皆合掌念如來名號爲我國家世世祝釐而并發其信
心歸依安養以供紹隆三寶居士此舉佛恩皇恩皆可報矣此余樂爲記也 萬曆丁
巳仲秋月

勅諭延福寺住持碑文

勅諭勅賜護國萬壽延福寺住持惟福及僧衆人等朕發誠心印造佛大藏經頒施
在京及天下名山寺院供奉經首護勅已諭其由爾住持及僧衆人等務要虔潔供
安朝夕禮誦保安眇躬康泰宮壺肅清懺已往愆尤祈無疆福壽民安國泰天下太
平俾四海八方同歸仁慈善教朕成恭己無爲之治道焉今特差漢經廠掌壇御馬

監太監王舉齋請前去彼處供安各宜仰體知悉欽哉此諭

萬曆四十六年八月二十八日

護國大善弘恩寺碑

前明天啟壬戌年建

吏部王舜鼎撰侍郎

神宗皇帝以仁孝膺久歷魁柄在握紀綱修明禮樂洽康之餘留神內典奉慈聖太后命間勅佛宮以崇像教其微旨蓋以扶王政而膏窳窳儼然二祖並垂二氏之家法也豈漢唐中主惑幻說導侈心以標天下從邪之路而儒術浸微者乎去都城之西南良鄉縣屬地曰舊店薄海朝宗輪蹄之所輻輳萬曆壬寅歲漢經廠掌壇舊都府管事御馬監太監楊君用目屬此地堪爲主上布福田遂結草陶瓦令緇流以蓋茗杓水濟陰炎湯已爲叢林之權輿矣延至乙巳有昭陵神宮監太監趙君良漢經廠掌壇御馬監太監盧君永壽張君然皆楊君用名下也續恢善緣具疏上聞神宗皇帝孝定國母欽施帑金虔造大雄天王伽藍祖師三大士等殿藏經閣鐘鼓樓山門厨茶庫司等房外有十方施茶捨藥左有靜室崇樓雜糧等堂庫殿閣內安供有釋迦佛之大士大悲千手千眼等佛佛像皆漆金像也週圍有果園菜園石築墻垣樹株約千餘棵至庚戌年欽賜佛大藏經及諸品佛經仍賜千佛袈裟鐘磬彩旛仍

良鄉縣志

卷八藝文志 碑文

四二

結華嚴社會募衆壇師歛金置供具十方香燈及贍給衆僧地畝若干頃寺之西北建有普同塔備十方遷化者是役也經始于萬曆丁未年月日落成于萬曆丁巳年月日蓋上承國母聖主之德庇下藉趙盧張三公並司禮監各衙門太監等官之善緣洎諸善信之至心皈依者以成此一大因緣夫出世之旨不有身安有子孫昔百丈愍律居之而廠創立清規至一針一草一椽一瓦皆以普心垂後後之人當體此意非十方有德爲衆所推服者不得主此三公之念以振迷拔俗其子孫並不許干涉並不得私以意立其所善之湍流行將與百丈永垂不朽矣今新天子仁孝光闡前烈紀綱禮樂文明以治卽不必究心佛乘其所扶王政膏窳窳者甯有已哉是爲記

重修良鄉縣學宮碑順治十年立

翰林院編修 李昌垣

皇帝中乂之九載壬辰躬詣辟離行釋奠

先師禮進更老饋餼致祝說經義於時褒錫諸儒臣博士弟子儀甚厚蓋曰惟后綏猷勸學迪誼洽聞興道以京輦倡函夏其爾郡縣守令廣厲學宮之意咸視朕夫風

指所屆近者先承良邑雖彈丸乎于京輦則腋及之其地較漢之三輔稱扶風馮翊者甚密重其人誦法孔子敦說詩書篤于文學其天性然也又炙天子之化朝施而日中徧焉爲牖孔易故良居衢塗爲衝首車書四達罔不由之先是官茲邑者督戈及飭廚傳吏卒緣南北界鄣望冠蓋令負帑驅道左疲於輪蹄年會間甚者星飯辰櫛家而催呼踵簿案訟獄董稽句考不暇理苟辦一切取支給已爾遑問廣厲爲以故子衿不嗣學宮鞠茂草云邑侯張公始蒞謂簿案訟獄董稽句考猥務耳迎送徵歛吏之俗者安與詩書事乃數謁

先師廟肄雅課士曰聖主右文過高光遠甚高帝謾罵儒生以馬上得天下安事詩書及其過魯命以太牢祀孔子光武投戈講藝息馬論道晚乃備三雍今上英齡幸學其風天下郡縣振陶雋彥起衰扶墜甚深且篤予承京輦地爲郡縣先卽不能如翟酺趙熹之議復太學堂房門館助流盛業及文翁韓愈常袞之徒設鄉校廣禮讓孝義於殊方顧覩泮水之鞠茂忽諸爰出歷俸鳩工庀材闔邑輸作恐後廡彷彿殿寢祠樓庑漏櫺枅磴磧朱紺雕鏤垣墀髹絢具甚自是學宮璀璨蔚倍曩時衆以功侯侯

良鄉縣志

卷八藝文志 碑文

四四

曰吾觀前史所載講堂荆棘自闢爲是聖道復昌之象桓帝末太學門自壞襄楷嘆謂斯文不振徵此由是言之廟之修廢教之崇替也吾吏近畿遵右文紹廣厲度不至如前之取辦一切置學校不務者因爲鼎新于予之志之職允協予違功邑之人則以侯之賦徭清簡字氓造俊卹羸剷暴政無不觀厥成也其甚者煥聖宇而裨帝治厥惟顯哉以質予曰如邑人言侯于中又之道尊

先師之旨甚得厥爲顯哉公諱士彪遼陽人戊子夏策仕癸巳春遷靖州牧人重之比于名教于城焉

新建魁樓碑

康熙十年立

知縣李慶祖

辛亥仲秋余補良令謁

廟畢週視饗序見魁樓傾圮且迫近宮墻兼失位次厥法弗善何取焉詢諸博士弟子員僉曰此魁樓自建迄今一無裨益鋒挫氣折見睨于有司者三十年嗣後蜀省吳侯建魁樓于城頭巽隅非不文峰高聳光聯奎璧取中若攜然而面向東南目送去水雖應運而興者有人其於勳猷事業猶恐未盡善也語曰琴瑟不調則改絃而

更張之此其時乎昔文翁治蜀首先學政而絃誦比于鄒魯甯武子令餘杭振起膠庠而中興侈爲美談況畿南首善之區輦轂咽喉之地可聽其沉淪而不鼓舞振作之乎爰同邑之紳士揆日測晷卜吉於學外東南高平之原創建新閣其近宮牆者去之時城陣者聽之暨取其舊材庀其新丹髹漆礎綜理精詳高舉文巒坐障逝者之波用挹斜飛之巽水太乙俯囑而納催官之曜遙聯峻秀之辛峯功肇於壬子暮春落成於本年秋孟青碧輝煌軒窗洞闢樓閣橫空清風直入視昔稱偉麗焉時偕學博郝君邑佐陳君等封牲酌酒展禮於下復揖諸生而進之曰天之所佑者善也主司之所衡者文也神之所效靈者順也人事盡於下天時應於上互相脗合而始孕靈毓秀發祥而呈瑞也若以跣跣之才惰窳之器悠謬荒唐夢駕奔湍之文而援神以助以幾倖於萬一此必不得之數也方今聖天子廣厲學宮勅各省學臣合寓內郡縣各拔其尤以充辟雍之選正斯文隆盛多士競奮之時也邑雖蕞爾乎圈撥之餘不廢禮樂衝罷之末尙事詩書矧余作人之念素愍思皇之士蔚起識雖固陋誠有一得之愚竊忍吝之而不見之實事乎猶之多士具垂天之翼吾爲積之風使

良鄉縣志

卷八藝文志 碑文

四五

厚焉而已多士操萬斛之舟吾爲積之水使深焉而已將見扶搖盪漾事相際而有成也余也何敢貪天之功以盡爲己力焉多士其勉之是爲記

良鄉十三里如意禪林碑記

聖朝仁摩義漸風俗丕變薄海內外罔不蔚興向化而慈宮梵剎之遍鄰孔道者亦加意焉良鄉古范陽郡迤邐而南十三里爲帝都孔道輪蹄麟集負販踵繼問途於茲者日繁有徒董理內務大主政戴公顧而念之謂先王送往迎來已溺已饑之政憐此行旅至深且切何忍覩此貿貿者行李困乏枵腹宵征竟不得一憩息之地爰是捐輸俸資庀材鳩工創茲福地殿宇廊廡計二十八間延僧梵修其中兼司香火且設迎送友賓之職凡燈油香供皆出於公又念四方遊僧經過者衆入不敷出乃置田三頃給牛種具夏稅秋糧悉貯於寺以供諸僧饘粥是役也不募一錢不歛一粟顏曰如意禪林夫公未操民社之責迺能破慳吝心濟無量衆供佛氏之慈悲行吾儒之忠恕卽一事而經營措置纖悉周詳始終盡善如此他日出寄封疆之任卽以是念應之政於是乎可觀矣功成勒石敬書以誌不朽賜進士及第翰林院修撰

汪繹撰文并書

大清康熙四十一年歲次壬午季春月穀旦

重修壽因寺碑 康熙六十一年建

國家久道化成河清海晏皇上于萬幾餘閒時巡畿甸所以修武事者省耕歛而無逸也道路經過遇有招提洞府間亦流覽憩息或命修造錫名懸額以爲民祈福凡大小叢林得邀宸翰則萬衆觀瞻遠近輻輳壇場香火爲之益勝良鄉縣北古十方院肇自明時歷有年所棟宇傾頽丹青漫渙庚子春駕過此捐貲重修爲皇帝祝釐康熙六十一年任寅三月朔落成蒙賜書匾額殿曰花臺止水大悲檀曰大悲慈航易院爲寺曰壽因天章璀璨鳳舞龍飛佛日增輝宗風丕振於以祝皇圖之鞏固綿聖歷于萬年廣祇樹之福因登斯民于仁壽者庶其有助歟

曹母王孺人捐置學田碑

知良鄉縣事 張 習

堯舜禹湯文武周公之道亘數千年而璨若日星昭如雲漢顯然於鐘鼓俎豆之上而未嘗少變何則蓋利每輕於君子而義亦重於鄉人苟非喻義烏覩鐘鼓俎豆之

良鄉縣志

卷八 藝文志 碑文

四六

盛卽所謂堯舜禹湯文武周公之道留於數千年之後哉或見君子之所爲大義之所在莫不欣喜而樂道之於斯見是非之猶在人心而大道至今未墜也良邑地當孔道駟傳倥偬戊戌之秋來蒞茲土恭謁文廟後思廣闢學宮集多士而絃誦之間閱文卷得武生曹大成之母王孺人願徹已產爲置學田以備丹雘廡宇及兩學師講習之資旣以鳴於前任陸君奉憲批而未卽行也余慨然曰此卽君子之義舉哉不爲之記勒諸石何以垂不朽且無以鼓舞鄉人使知大義也嗚呼非財之難有財而善用其財實難善用者非難善用而出於巾幗者則尤難且夫閨闈之中耳不聞聖賢道德之言目不覩鐘鼓俎豆之設一旦創此義舉爲之子者善承意旨而卽以鳴之官則其在家庭間又將何如也若孺人與其子雖未悟堯舜禹湯文武周公之道抑不得爲鄉人中之君子乎哉 乾隆四十年立石

新建挾河中橋碑 同治十二年建

知涿州事 周紹達撰

挾河亦曰挾河一名夾河有二源一出房山縣西南上方山諸溪澗名灌河一出房山縣西南白玉塘與灌河合曰夾河舊志所謂挾活河者是地當涿良房接壤畿輔

往來大道向有濟渡石橋前明州郡王將軍鐘所建年遠沙淤同治八年三州縣官紳集資修濬碑載其事不數年水徙而北舊橋幾於虛設十一年署良邑高君建勳捐俸建新橋三孔於北分納河流第水勢漂疾霖雨時輒復漫溢爲行旅病今年春吾師兼尹萬公自西陵將事回道經此地惜前工未竟其勢欲就新橋南設橋座與南北兩橋相屬俾水各就所趨無蕩決患捐俸二百金囑紹達與知良鄉事王君會同房山令張君協力勸辦購材興工選派紳董分理之接石橋爲涵洞四閱三月而告竣是役也不費國帑不取民貲計虹身雁翅及兩岸鱗比石砌並南北之兩橋欵者正之塞者濬之共經費一千八百餘金除吾師倡捐外諸寅好踴躍繼輸適新任涿牧錢君來足成其數從茲砥平軌順屹然與涿之永濟良之飛虹並稱利涉者皆吾師力亦各寅好體吾師之心爲心也會橋事竣而余亦卸州篆爰叙顛末勒之貞珉庶官斯土者以時修補無失徒杠輿梁之意也夫

良鄉縣楊子英縣尊裁革車徭德政碑記

長 馨

自古愛民之官固無一事不愛乎民無一時不愛乎民也惟理良邑車政之官則往

良鄉縣志

卷八藝文志 碑文

四七

往欲除弊而未能者豈時事使然官顧不愛乎民哉考之輿圖良邑爲京畿首站十八省通衢差務絡繹需車浩繁正歎無多價不敷用官民受累善莫能策前以軍書旁午房吏遠患謔遜其事於差役創名目曰車頭從此官事日愈壞民病日愈深頌項竭蹶辦理失措力田之騾馬戶戶充公行路之輪蹄條條繞道上不能禁而姑容下不聊生而忍受過斯境者咸嘆有此車差若幾無愛民之官矣閱自光緒四年楊子英縣尊由固安任來署斯邑甫下車已洞見車差積弊欲加整頓而不遑者原以暫權縣篆先舉行賓館積倉諸大政未暇及此旋即奉調回任邑民蹙首若有所失今幸矣幸夫子英縣尊實拔良邑理茲車政當必有異矣乃猶是紛紛差務也蒞任未久舊政煥然一新聲麟麟曰官之車也鳴蕭蕭曰官之馬也執鞭攬轡與夫喧填曰官之僕御也道路改觀風塵變色望而訝之者走相告語舉首加額爲斯邑慶以爲民何修而得此官官何術而有此政乎夫治法非難也治人難治人何難難在不囿乎人之治以爲治耳積二百年之弊病忽掃除於一旦此誠非煦煦之仁子子之義所能奏其效也感者聽之怨者聽之只此爲民除害不留餘憾之心足以格斯民

而信上憲具詳稟裁車頭發明示設公局且置備車驟以應差除過兵舊有詳章外餘差不藉民力概無貽悞立法之良未有逾此者也尹憲嘉其政憫其勞委能員以襄之籌津貼以助之雖試辦已行少取之而不爲虐第恐責有旁貸日久仍蹈故轍乃悉舉而辭焉統核所用年款僅得生息銀七百餘兩尙虧銀款甚鉅盡數皆出自縣官於本縣人民及過往車駝絲毫不擾未事而不與人商既事更不求人諒申牒詳文立成定案俾再來新令尹不告而知大哉其德也乎大哉其德也乎今者廠役星散矣客車遠來矣昔之充公者不悞農事矣昔之繞道者直驅蕩平矣口碑傳頌姑不遽論卽窮鄉僻壤之間杖鳩白叟竹馬黃童咸欣欣樂道其事况實惠均霑同深感激者烏能已於言哉闔邑士民謹將德政形諸筆墨勒於貞珉非敢作諛詞也抑以願居是邑過是邑不受擾累者日後知所由來道盛德至善垂諸永久於不忘云爾

光緒十一年冬月

重修良鄉縣文廟碑記

知縣王汝廉

我朝崇儒重道先師廟徧天下所以端士習正人心也良鄉距京師七十里學宮較

良鄉縣志

卷八 藝文志 碑文

四八

畿外稱宏敞光緒乙未冬予奉命來治斯邑下車後展拜廡下見瓦礫雜杏棟析榱崩滿地荒涼不堪目覩詢諸學諭鮑君司訓遂君始悉廟始於明萬歷初年入國朝至道光丙申重修迄今五十餘年光緒十六年山水陡發由城西門貫入廟址幾被冲陷兼以大雨連旬徧形滲漏至十九年夏而大成殿一幷傾塌矣屢議重修均以力未逮而止噫此豈所以欽聖靈哉越明年雨暘時若麥復大熟爰捐俸貲集邑紳耆謀更新象亦與予有同志踴躍爭輸不日集若干金用是鳩工庀材閱數月而大成殿兩廡暨名宦鄉賢文昌各祠煥然一新觀瞻於是肅矣仰企門牆臨流泮水吾願博學弟子瞻先聖之崇嚴曰是吾夫子道全德備師表古今所以尊擬天地也觀兩廡之配享曰是某某文章勳業炳耀乾坤所以俎豆千秋也辨名宦鄉賢之崇祠曰是某某澤被生民功垂桑梓所以馨香百世也他日爲名儒爲純臣爲孝子悌弟留人心於不沒揭聖教以常新不負聖天子壽考作人之至意予有厚望焉斯役也經始於三月十三日落成於十月十五日予尤喜功成之速而邑之士庶勇於向義也謹詳始末用勒貞珉

大清光緒二十三年冬月立石

補修良鄉縣文廟記

教諭鄭榮桂

良邑文廟自光緒丁酉年大修後廟貌壯麗洵稱鉅觀乃甫閱二年遭庚子兵燹法兵分駐南門內肆行蹂躪始則取大成殿之梁木以爲薪遂將神龕供案及闔廟之門窗悉行取去併將東西兩廡大成殿摧拆過半其完善者僅櫺星門耳一片荒涼傷心慘目奈之何哉迨和議成洋兵撤邑之士紳謀有以修補之而需款之爲數不貲矣仰賴聖德高深人心踴躍共樂輸將遂得集款千餘金於是鳩工庀材經始於癸卯閏五月落成於甲辰六月而廟貌又煥然一新斯則先聖先賢之所以食報於後人也而人心景仰之誠亦自有不容沒者耳

光緒二十八年四月

王徐氏碑記

清光緒十一年五月立

舉人徐端

夫懿行可傳何必不出於巾幗休聲是播何必不起於閭帷節婦王徐氏自夫逝世非不願爲摩笄之刺也石之貞因遺孤待撫幼女無依再四思維不守苦節固無以立名不留餘生更何以啓後由是來興隆莊母家得所依歸篤乃鞠育迨遺孤稍長出嗣夫兄幼女稍長宜爾室家乃立長孫治承嗣脈延一綫計在百年爲之立門戶使其以垂久遠並得俾隨時致祭創垂悉備締造維艱又念及母家鄰里徭役民不聊生夫差幾無以應捐自置民地若干以供夫差之需好善樂施出自天性爲然值茲旌表之膺牌坊之建爲述生平以見不朽自有真也

獨力創修節孝祠碑祀文

訓導 遂鳳圖

節孝隆名也節孝而入祠盛典也其始也必得薦紳先生爲之採訪稟請然後能以次上聞迨奉旨旌表而爲之後者或無力以建坊立祠或有力而不肯爲雖曰節孝久之將有湮沒弗彰者惟良鄉縣王節婦有其孫王治爲之先建坊後立祠可謂克垂久遠毫無遺憾焉節婦姓徐氏邑之興隆莊人年二十五歲適同邑王俊爲繼室越二年一女生而夫亡矣家無恒產志矢靡他因携其女歸依母家仗十指以爲生居恒寡言笑而善居積不數年已稱小康及女長適五品護衛李公名佩璋之室氏念獨居非計扶持無人乃撫前室之孫卽名王治者以教以養視若親生焉又數十年田園日增孫曾滿堂維時已合請旌之例經邑紳舉人徐端歲貢游觀易爲之聯

名具稟得旨後卽於本村建坊矣壽至八十三歲無疾而終喪葬具如禮伏思節婦青年守寡苦節自礪乎柏舟白髮全歸遺徽得標於彤管求之古人殆共姜之流亞歟至光緒丁酉年良鄉縣重修聖廟王治奉其祖母之遺命捐銀二百兩並幫修文昌祠錢三百吊蒙邑侯王公詳稟上憲獎給五品頂戴又因節孝祠在文昌西廡下其僅一間非特規模狹隘亦甚不合體制乃於祠之東偏購隙地一所獨力創修祠堂三間週圍墻垣門樓一座落成之日奉其祖母之牌位並閣邑節婦之先列祀典者咸移入焉用以永昭貞節而共享馨香嗚呼若王治者可謂克盡孝思者矣可謂力成善舉者矣世有坐擁厚資忍聽其親之苦節芳名日就湮沒者不知凡幾見王治之所爲其亦慚然愧奮然興否耶事有關於風化理宜勒諸貞珉

李氏宗祠碑記

邑進士游觀第

禮天子七廟諸侯五大夫三士一隆殺不同其所以尊祖敬宗報本追遠者一也漢唐以來自非帝室則宗廟之制不講士大夫家類皆法適士一廟之遺意建祠以祀其先吾鄉土著多係明成祖時遷徙之戶無甚巨族故建祠者寥寥相習成風往往

良鄉縣志

卷八藝文志 碑文

五〇

有既富且貴崇侈宮室輪奐改觀至問其所以妥先靈者則仍循庶人祭於寢之例揆諸於營室宗廟爲先宮室爲後之義蓋闕如也李耀廷嫻弟家不過中人產耳獨毅然有志於此上請命於諸父旁參謀於族人於光緒戊寅宗祠告成適予久客還鄉屬爲記事以予在深州修遠祖墓有同志焉故也雖然予與耀廷志同而力不足曩客深州見祖墓凌夷墓田半鬻不得不於筆耕所入餬口之資節而儉之積三年而後成事若建祠以祀先則猶有志而未逮也以視耀廷此舉能無歎然乎李氏在前明時爲畿輔巨室里居京東其遠祖墓在京城左安門外龍爪槐村今猶祭掃也其田產多在良鄉縣國初定鼎優賚從龍之將士有占圈之例田旣入旗人亦投旗就耕圈地遂移居於良鄉縣西大紫草塢至康熙四十八年分撥和碩履親王府當差賞鑲白旗滿洲二甲喇入册今徙居良邑南交道村又四世矣其里轉徙及隸入旗籍之由家譜未載耀廷欲以示後人故屬爲附記云

光緒十一年六月

御製惠端親王碑文

朕維分列尊行朱邸之貽型共仰名垂後裔青珉之紀績長存典宜重於展親情亦

深於追往載頌芝綵式煥松阡惟和碩惠親王迺朕之叔父也秉性端凝持躬謹慎恩推一本早膺茅土之封眷渥三朝永衍葛根之庇侍禁掖而常履寅畏統旗營而益矢辛勤巡防之責任匪輕熊隊整奉命之聲靈有赫虎豹韜爛手諭仰承召對毋庸乎叩拜肩輿入直儀文特示以尊崇荷先帝之榮施禮有加於長長迨朕躬之嘉賴念彌篤於親親稟命慈闈宣勤秘殿翊沖人而典學啓沃良多停庶務以節勞康強可卜方冀修齡之克享何圖痼疾之莫瘳遽告淪殂實深悲悼賻金厚賚帑邀內府之頒奠罍親行封畀後昆之晉易名有典爰諡曰端於戲令德孔彰百世延銀潢之澤成勞勿替九原耀石碣之輝式峙穹碑用昭遺矩

十三里嫠婦劉龔氏捐款記

左 珍 邑人 廩生

余村公會舊有捐款一百一十九緡本擬逐年積累俟其有餘以辦村中公事竝歷年差徭等用乃數年以來依然不足合村人等正在束手無策適有本村嫠婦劉龔氏忻然嚮善樂輸制錢七十緡民地五畝旗地十畝贊襄此事誠善舉也亦閭閻中之慷慨者歟合村於是鳩集大眾曰古人每有義舉皆勒之於碑以流傳於後世者

良鄉縣志

卷八 藝文志 碑文

五一

蓋恐年淹代遠令德不彰又恐宵小侵吞後人無從稽考也於是誌之

光緒二十五年六月

重修關帝廟碑記

左觀瀛 邑人 生員

蓋聞神道至靈有感斯應人性皆善有觸斯通此其義嘗於余鄉遇之余鄉村東舊有關聖廟一座其肇基不知始自何年然幸有斷碑存焉蓋由前明嘉靖間經工造廠管事奉御鄭公及丁字庫管事內官田公李公朱公各捐己資秉虔重修嗣後本村又置香火地七十餘畝噫此皆前人遺意誠爲樂善好施者哉顧年代有變遷之異人事有興廢之虞延至近數十年來遂有不堪言狀者風雨摧殘傾頽幾徧烟塵燻染汗穢難堪甚至迭經不肖住持竟將香火地畝典當一空磚瓦木材拋棄殆盡將輝煌殿宇變爲冷落荒墟是時余鄉文生劉棠左琇劉文漣武生劉文漢民人史富劉連等相與議曰此關聖廟也今若此何以棲神而妥靈乎於是發心意存宏願適余村積有雪花會存款四百餘緡又前數年贖回香火地屢年積款二百餘緡僉曰先修正殿三楹西禪房三間牆垣一周此款尙當敷用胡弗起而重修歟爰擇日興修鳩工庀材不數月而功遂告成此光緒二十八年事也尤可異者當修工將止

之餘工人掘地忽現觀音一尊衆皆愕然將欲再爲興工而資財告匱而要不可無以處此不得已乃於殿左設神龕焉噫此舉雖屬人爲其有神爲之助歟語云至誠感神良不誣己後宣統元年又積樹款洋銀壹百三十元又會款三十一元文生劉棠劉檀武生劉文漢左立瀛民人史富劉貞等更修觀音殿一楹東修公所三間於是輪奐一新神光溢彩輝煌金碧色色莊嚴此余鄉諸生之力也因索余爲記俾勒之貞石以垂永久余雖艱於文而義不可辭故論誌之尤願後之樂善好施者常爲增修飾美而毋墜云 宣統二年孟冬

創建琉璃河輿樑碑記

舉人呂植

琉璃河古聖水也發源於房山之龍泉峪澄清澈底朗若琉璃遂以此得名焉有石橋跨其上揚帆而至者開窗西望狀類飛虹居良鄉八景之一洵畿南勝地也挾河之水自西南來至村東與此水相滙以故緣南岸東行路不能通舊有草橋以行車馬然至夏間水漲恐爲洪濤漂沒每拆之以俟秋後重修行人咸以爲不便也嗚呼一水空明帆檣雲集沿隄商賈樓閣參差馬驟車馳征途絡繹柳橋晴絮天然一幅

良鄉縣志

卷八藝文志 碑文

五二一

畫圖至夏間望洋而歎悵一葦之難杭豈非一大憾事哉今何幸我 曹師長創建輿樑永作慈航之普渡商農行旅經是途者歌功頌德當何如也 師長名錕字重珊我直隸天津人也於陽歷三月帥第三師駐節於此保護閭閻掃除盜賊爲一路之福星凡不便於民者則去之有利於民者則興之歎一水之阻長憫征人之病涉爰發鉅款以興大功鳩工庀材閱兩月而告竣凡過此橋者孰非實惠均沾者哉然師長實惠在民此橋不足見其萬一也將來維持大局作砥柱於中流普濟羣生爲巨川之舟楫此橋非猶是小焉者哉然我商民受此大惠銘感不忘爰勒石以記焉

重修長羊村石橋碑記

王朝凱 邑人 生員

良鄉爲京西首站北界長羊係十八省之通衢舊有石橋四座他橋雖殘缺尙可緩修惟村中有長橋一座名保安橋兩頭缺石甚多每日過往車輛不下數百行人不止數千重車至此困於難行遲延甚久村人目覩行旅艱難每欲興功苦於無款適本村紳士王啓瑞向都中富商大賈求其捐資助款村人又籌款若干但此橋係國

家創造理宜稟之於官紳等遂聯名稟於王縣長縣長批云紳等熱心公益進行不己不獨本知事樂觀厥成卽良鄉合邑亦應聞風交譽紳等遂卽日興工經營不遺餘力不及兩旬大工告成適沈大京兆巡視來良步履橋端曰此處地勢窪下幸賴此橋登覽之頃歎羨不已因將修橋始末勒於貞珉以垂久遠焉 民國四年六月

修理護城橋道暨西南二橋之碑記

邑人見之深

生

夫道路不治自礙交通橋梁不修難言利涉是以合方載於周官視途詳於國語周道如砥原無覆轍之虞長橋臥波可免涉川之病古昔盛時固無不於橋梁道路加之意者也我良爲京畿要隘南北通衢冠蓋不絕於往來車馬常喧於晝夜若非履道之坦坦勢必臨淵而兢兢如使怨聲在道豈非邦人之羞乎乃者縣之東南兩關橋旣傾頽道尤低下其南爲三孔之橋其西有引河一道當山水之漲發每險象之環生日暮途窮行人裹足爲阮籍之慟哭者有之爲王陽之返駕者有之觀茲景况盡焉心傷乃集同人聯合善士祝玉成於義舉幸金諾而慨捐於是鳩工庀材築新補舊於民國六年春日興工夏日竣事橋安盤石道履康莊旣無濡軌之凶更鮮滅

良鄉縣志

卷八藝文志 碑文

五二

頂之險彼嚮之畏三危而歌行難者今則平九折而歌有蕩矣爰記始末用勒貞珉非敢云侈建築誇善舉也特以爲輸財仗義者不可使湮沒弗彰爾後之君子補葺之重修之庶幾坦途之永固則尤爲馨香所切禱者也 民國八年十月

重修天王寺碑記

謨爾根保

貢拔

天王寺我邑最古之禪院也創建之始詢諸邑之耆老鮮有知者然考其遺址規模宏大已歷有年所矣其先有僧海秀梵修其間後因廟產無多不知幾何時而雲遊不返自茲以往住持無人歲久失修棟宇漸就傾圮光緒二十四年幸經我邑黃君秉辰自行捐募略爲修整彼時雖未復舊觀而正殿尙稱完好不意庚子之秋拳匪肇亂又被聯軍所焚而廟宇佛像俱成灰燼蕩然無存矣民國十二年春城之東北隅舊有土地祠一座地基爲駐防營所賣彼建築者不忍出於拆毀而謀遷於他方當斯時也我邑急公好義諸君心焉憂之念精爽之無憑欲保存而不得於是集衆公議將彼之偶像廟材移易於此而重修焉復塑以釋迦大士之像合而祀之則勸募資財添購木石經之營之不日成之從此廟貌巍峩神靈赫濯匪但崇一方之信

仰亦足壯閭邑之觀瞻其功德誠無量矣工竣將記其實凡發起者監修者捐資者書其姓名勒諸貞珉使之流芳後世永垂不朽焉

民國十二年

啞吧河橋碑文

啞吧河在良鄉迤北距城八里村東原有南北河引東西橋一座我良爲京西首站十八省通衢行人往來絡繹不絕後因河改東西此橋作廢於是闔村公同商酌按地籌款移無用之橋改爲有用且有急公好義數鄰村相聚面商出資相助惟橋工關係綦重民人不敢擅爲因公稟縣長准予興工闔村踴躍從公捨家事而不顧旬餘間大工告竣積數十年之障礙忽然交通于一且昔之繞道者今則頌聲載道直往而前矣試思經營此事心力俱勞謹將始末併各村協助芳名勒于貞珉以垂久遠庶後世得所稽考焉

民國十三年立

序

良鄉縣舊志序

康熙十二年
邑人張珽

良鄉縣志

卷八藝文志 序

五四

歲在壬寅愚縮尺組治古乾侯視事再稔政紀粗立爲邱志綦詳已而事竣撫卷嘆曰宰是邑而志生吾邑而弗克志豈古者重父母國之義哉詩曰維桑與梓必恭敬止委文獻于草莽恭敬之謂何先是仲氏大公令澠池成澠志亦用惓然懷本欲求良志纂緝而未逮也茲以尙書郎拜侍御史臺事間發笥取余所構舊志而續之緘書問序於余余尋素懷遂勿讓以卒業焉留質於邑父母以待鋟梓謹序之曰君子居是國也一國賴之鄭公名鄉公超成市極其致弭裁却亂光照四封紀在簡策若乃修立廢墜詔之以儀型并可傳述則先民之澤于鄉國尤章章者也邑之有志較國之史則稍狹較家之譜牒則已廣國無史則是非不立家無譜牒則統系勿昭邑志之重從同然史有專官譜牒責之宗子皆有所不容諉者而邑志獨異如良之志荒墜百餘年既燬而僅存亦有足慨者矣蓋才之不文莫余若吏之不敏莫余若簿書期會拮据鞅掌且懼有缺事然猶勿敢讓焉者將使載筆之君子顧而思之思夫邑志之不容諉猶夫國之史家之譜牒也則繼此而修吾遺軼亦何忍置之百年哉億矣吾良自故明隆萬時邑大夫告民勞呼將伯詳在舊志流極至今雖皇朝更化

二紀間生聚勞來日不暇給且國之大事惟賦與役吾土受補定州疲民收債往返千里仰給公上而定之工於逋者尙賴我公祖父母加意調劑至若常役之外因郵舍之圯使輶旁午館於民之奧阼菱芻供億蕩析悲號是一邑之賦役較萬國之租庸調倍當其劇也使爲政者風聽臚傳思所以善其後則疾苦之緩急修救之源流非志無以詳矣抑良之爲俗士樸女侗節義忠貞炳然竹冊富穀之權在上觀感之事在下吾能無厚望也耶邑雖蕞爾乎竇諫議之嘉德樂將軍之偉烈邱壘在焉修身慕義至誠感神用世顯於邦家若諫議父子足以爲樂喜者之勸天下豪傑之士來遊京國登望郭陳之臺感燕昭之餘風退而弔望諸君之墓必且有慨然自奮於功名之會者而况吾邑人也

捐藏書籍序

儒學教諭李維翰

良邑爲畿輔首區旗民錯處凡士庶家子弟之秀良者多不以學業爲急務以故每過歲科童子試恆寥寥其人至棘闈大試比科以來復無一人入彀豈昔有竇氏而今則絕其響耶抑亦造就者未得其道耳余不佞未嘗學問謬叨秉鐸竊見文教未

良鄉縣志

卷八藝文志 序

五五

興士功顯廢心且殷憂焉因思講習討論運舟之楫也詩書典籍載道之舟也若止日夕聚集講堂共勉文藝而無詩書典籍存證其言是猶運楫而無載道之舟徒滋空言則烏乎可余既待罪是邑敢不廣集書籍以公同好况

黉宮規制例有尊經閣數楹藏書良邑學校草創未備余謹將諸書列目櫃緘凡諸生會藝之日相聚閒觀永存無失儻獲紉譯奧義造詣大家則秋薦春榮奪標會狀在昔燕山之竇氏豈不昭美於今日也哉爰序數言用誌不朽

呂師臣先生遺墨序

吾儒之學道德爲本文章其末焉者也嘗慨讀書之士往往以文詞相尙夷考其行而能踐其言者甚鮮流俗靡靡不以爲怪蓋道德之不講也久矣同邑呂師臣太姻伯少工制藝爲同學冠一時文名藉甚中年後講求理學頗有心得乃棄科舉而窮究象山陽明夏峰之學躬行實踐粹然儒者其嘉言懿行足爲鄉里矜式迄今稱頌弗衰然講學之餘間亦發爲吟詠以抒寫性情每作詩文楹聯輒爲人所傳頌但隨手散失從未留稿焉敬亭哲嗣克承家學爲名孝廉懼手澤之罕存傷遺文之零落

爰多方搜集僅得楹聯六詩二文一恭錄一册珍藏於家以示子孫傑拜讀之下覺至理名言發人深省朝夕玩索愛不忍釋雖著墨無多而吉光片羽足爲世珍所謂有德者必有言其古之篤行君子也歟民國九年四月姻再姪吳士傑謹識

呂師臣先生遺墨序

余讀呂師臣先生遺墨一編不禁廢書而歎也夫以先生天資之高而肆力於陸象山王陽明孫夏峰諸儒之學剴繁茹精孳孳焉唯日不足本其所學以應天下事何施而不可乃懷抱奇異曾不獲一試而以諸生終吁可悲也其人既以理學爲宗故其發爲文章樸實醇厚粹然儒者之言然生平不欲以文鳴於時每有所作不輕以示人而人之傳頌其文者亦遂鮮洎乎庚子之亂一生著作俱已散亡則雖贖稿殘編而不可覩矣乃敬亭先生懼先人之文采無以表於後世也於是博採旁搜網羅散失乃久之而迄無所獲心竊痛焉不得已乃將平日默識於心者計楹聯六詩二文一錄爲一册以示來茲且爲之註解以申義詩歌以誌哀雖著之篇者文墨無多然而孝子之心苦矣嗟乎清代以制藝取士士之抱實學而沈淪不得志者曷可勝

良鄉縣志

卷八藝文志 志銘

五六

道奚獨爲師臣先生悲獨至文之足以傳者而亦與人偕亡可悲孰甚焉余不悲師臣先生之不遇而悲文字之不傳余尤悲敬亭先生本純孝之心以搜集遺亡欲使後之人覩其全書而卒不可得令人俯仰欷歔而不能止也然余聞之吳南屏云西垣之詩少而可傳今先生是編不亦以少爲貴乎哉嗚呼此亦足以傳已民國九年夏四月姻再姪吳士英謹識

銘

唐故開府儀同三司使持節隴州諸軍事行隴州刺史上柱國南陽縣開國伯張府

君墓誌銘

并序

文林郎前守媯州司倉叅軍李伯良撰

公諱道昇字道昇幽州范陽人也其先黃帝軒轅氏大聖之後弓裘不墜故留侯子房相漢司空華匡晉洪勳茂績譜牒詳焉故不書公則司空十七代孫也曾王父朝議郎守檀州司馬徹祖王父朝散大夫行媯州長史克明王父驃騎大將軍持節毫

州刺史令暉公則亳州府君之元子少有奇節素多方略知文可經邦乃伏膺閱史武以戡離則彎弓習射至若龍韜豹略之術縱火沉沙之榮莫不研精覃思窮理盡性釋褐充節度副將轉左金吳衛大將軍旋充左廂步軍大將兼節度押衙節制朱公守議歸朝公演成其意遂率精騎二萬西赴闕庭署公爲行營都知兵馬使帝嘉之拜宋公爲丞相旋除太尉兼隴右節度聖朝以公有輔佐之勳特賜車馬金銀緡綵萬數皆實諸邸下令將士裁用之一金不入私室其廉潔有如此者積功勞遷特進開府儀同三司持節隴州諸軍事隴州刺史上柱國南陽縣開國伯頃爲羌戎搆動毗庶不安征戍者望烟塵農耕者帶弓矢下車之後

令而農夫擊壤明

斥候而軍人臥鼓其政術有如此者時屬驕陽

公詢諸靈跡欲往祈之境

內有二姑神素多靈驗祈者必應公虔心禱請許

香纔焚而陰雲滿空酒再

酌而甘雨盈尺遂減已俸特建壯樓今存焉其誠

有如此者嗚呼運有脩短時

有廢興夢入兩楹灾成一豎染感疾纏綿奄終於安

私第享年六十七嗣

子佑次子俠瓊玉連枝皆稟醇孝絕探泣血扶護還鄉貝元年冬十一月二十

良鄉縣志

卷八藝文志 志銘

五七

五日庚寅窆於幽州良鄉縣園溝山原禮也

節度押衙

鎮守副使御史大

夫道宴痛天倫之永別撫諸孤而猶子命刊終天地焉

大房東瀘水西雲

漠漠兮風淒淒軋引氣兮掩重溪黃泉九重兮

山峨峨松鬱鬱青龍盤兮白

虎屈三陽返照兮神藏獸沒拱木千春歛幽魂兮累主成墳銘勅石玄堂掩兮天

地永隔 高岸爲谷兮深谷爲陵慶流百代兮子孫灑灑

按此墓已無形迹邑人未有知之者民國十二年在城民人王懷於西門外地中掘土既而發見磚塊又深掘之棺木烏有而得墓誌上下兩方審視則唐張公道昇卜葬地也攷之之家禮凡古人喪葬皆有石誌此石行間雖間有闕文而確爲古墓無疑由唐至今已更數代而不先不後適見於修志之時豈鬼神式憑不欲久而湮沒歟

民國甲子春月識

奉政大夫四川按察司僉事雪堂楊公墓志銘

王用賓

四川按察司僉事楊公於嘉靖八年己丑二月二十五日歿於泉邸其子守正聞訃衰絰請余曰哀哉吾父已矣茲惟有墓銘以慰諸幽敢圖之執事余惟公昔與家君

同舉進士官內臺誼至厚也惡可辭公諱秦字濟之別號雪堂其先爲山西潞城縣人洪武中始祖以軍功授潞州衛百戶高祖繼襲遂改隸興州中屯衛焉曾祖信祖勇河南湯陰縣主簿父琢以公貴贈監察御史母宗氏贈太孺人公生而英敏端慤不妄笑語爲兒時父問之曰女志何如我欲爲御史父奇之乃遣就學讀書卽曉大義長爲弟子員弟子員皆勿公若也正德庚午領順天鄉薦丁丑登進士第已卯除行人司行人時武宗毅皇帝南巡命下公率同列抗疏諫立謫除國子監學正公在國學嚴而以禮勤而有方爲諸子敬服居無何以御極詔復公官擢福建道監察御史公正色直言彈劾弗少避其奉勅陝西清戎也刈慝植良獎恬抑競昭貞烈讞疑獄民用大悅先是抽丁補伍輒復散亡公曰是貧所至耳迺察其殷富者使厚遣之貪吏冒逃卒以私餉者歲逾數千石公檜諸邊籍得其情俾悉償焉自是軍實足豐餉不悖出矣上以公爲可用仍勅兼覈戎器工以爲工居肆則藝精物有軌則費省迺奏于其地諸鎮建局除器而以時出納之時少師石琮楊公總制邊務一日過陝講武病其器敝公令悉易之石琮公嘉曰我軍固有恃哉己酉還朝公攝四道事有

良鄉縣志

卷八藝文志 志銘

五八

囚當死託鄉人以千金賂之公叱之曰我知其法耳而不知其他自是疏之明日遂辭病弗出丙戌春進陞擢用督理三川屯艦公至杜奸商之弊懇山谿之田編氓德之民平廣安之寇時臬司諸公遷除勿至事多停委咸暫攝之獄無滯囚案無留牘當道者交章奏聞戊子蜀大饑廷議命藩臬二人賑濟皆曰非楊僉事不可乃周歷郡縣區處咸宜凡數月力憊而疾竟不起春秋四十有八距生之辰實成化壬寅七月七日也於戲公有致遠之才而弗克究其施有濟衆之仁而弗獲享其壽昊天不弔咨痛何及惜哉公平生以不逮養親爲恨每登第泣然涕泣事叔樂耕翁情禮咸備兄泰歿鞠孤事寡逾於平日蓋其天性孝友如此然待人處已絕無驕吝爲詩文多奇思有迺巡集十卷配王氏封孺人宣慈惠和公多賴焉子四人長守正次守直守公守義孫男女二人諸子皆好學能自樹立君子謂雪堂公不死矣其葬是年十月日暮在良鄉舊店西三里祖塋銘曰奕奕楊公肇自晉衍世濟其武公以文顯惟公之生履直秉貞始非諫官世以諫名繼登臺憲風裁凝肅孰謂理輪豺狐斯伏泰山有華蜀江有岷溟漭巖嶽允哉公化仁胡勿壽我心孔疚勿於其躬必於其後壽

非在齡惟名惟德於萬斯年視此銘刻

守朴趙公墓志銘

楊維聰

嘉靖丙辰夏六月乙巳守朴先生卒於山丹衛先是公爲兵部尙書論者斥其進爲逆鸞所引謫戍山丹既卒樞還其鄉將以丁巳春三月庚申葬于良鄉北郊太平莊之原從先兆也墓宜有銘當得王公大人之筆以爲之重而罪廢之餘禮主其減謂維聰少嘗相知仕嘗同僚且有姻親之好公弟國子生金來授簡焉義不可辭乃撮其大者如左公諱錦字文卿守朴其別號也先世太平當塗人高祖華玉曾祖永安居采石祖通以例北徙今爲良鄉人考宣號義菴祖父俱以公貴贈大中大夫山西布政司右參政祖母李氏贈淑人妣任氏封太淑人生二子公其伯也幼而好學蚤著文譽嘗隨後渠崔公月湖楊公游月湖公以薛文清公讀書錄授之自是潛心理學舉正德癸丑鄉試登丁丑進士授南京戶部浙江主事公司揚州鈔關鎔銅爲櫃竅而鑰之所入既多則銷以儲庫人不得而爲私焉又創水竇于關梁之南小舟可經出入得以免稅迄今使之陞署郎中調南京吏部稽勳司郎中人爲兵部武庫司

良鄉縣志

卷八 藝文志 志銘

五九

郎中改武選司職方司 中大同軍變戶部侍郎永年胡公奉命往平之奏公爲佐歸掌職方事凡將領之賢否邊塞之險平糧儲之充耗皆備訪而默識之有所施行無不允愜大司馬倚重焉由是趙郎中之名譁于人口繼爲大司馬疏言其專復出爲南京戶部河南司郎中陞温州府知府山東按察司副使山西右參政浙江按察使擢右僉都御史巡撫延綏管理軍務道聞太夫人之喪而歸服闋改大同有忌之者論其不可用冢宰力稱其賢上竟用之總帥周尙文者老將也不事掎克得軍士心而果於自用性多偏執公以體國爲念不憚屈已與之交歡然遇不可者必盡忠告周以爲怨慮且將誤事上疏求退改甘肅甘肅遠在西陲未幾考察巡撫公名爲所指罷居良鄉家居略勢儉約若寒素然憂時感事則每致身爲念門垣戶几多所題識公廣陵有別墅或勸之往公依依不忍曰昔人云窮達戀主耕桑近郊公之意蓋如此公既不肯忘世世亦未肯釋公嘉靖庚戌春上用公爲廷議命下卽日單車就道兼程抵鎮弔死問疾恤孤掩骼蒐卒簡將不數月人心遂定上疏論兵機十六事久任夏官歷典邊鎮兵機政要閱歷有素事至立決無壅滯者晨興入部日晏方

歸不以寒暑少廢司屬敬服軍士感悅以功廕一子錦衣衛百戶加太子少保公在甘肅大同與仇鸞同事入京之後頗相乖忤過從笑語乃人情之不免者山丹之行惟悼臣道之不成仰聖恩之宏貸無幾微見于顏色嗚呼豈惟公哉蔡邕之於卓龜山之於京其不幸亦猶是也公爲人謙和每事從厚尤友愛諸弟俸入之餘皆以委之別無私藏從弟金視之如同出以例爲國子生賜恤宗族姻黨不惜勞費酷好經史閒居手不釋卷著論議若干卷目錄若干卷詩文若干卷年六十有九配陳贈淑人繼配張封淑人女三長侯孺人所出適永清左衛指揮同知周佐次鄭孺人所出適維聰弟之子文稱固安庠生也次金孺人所出適同邑監生張維厚弟銳子二伯世官卽受廕者先公卒仲世錄邇嗣前廕公之行實其紀載具於國史稱述在於鄉評一介書生致位八座雖老而荷戈爲國殞命亦其願也孤魂萬里識與不識皆所痛惜而況如聰者哉

銘曰

於惟先生間氣之英藝苑挺秀理學研精芥拾青紫世網遂嬰郎署允閱藩臬薦更

良鄉縣志

卷八藝文志

志銘

六〇

三典邊鎮再陟孤卿徊翔中外舍藏用行礪發利刃惟才之宏忠實貫日惟志之誠一德匪懈指天爲貞溘死流亡不怨不驚太平之莊鬱鬱佳城卿雲瑞靄耿耿常橫

衡宇張公墓志銘

王無咎

順治戊子秋前朝封奉政大夫山東提刑按察司僉事張公考終正寢冢嗣候選縣尹君旣營葬事顧幽石未備持狀詣縣問銘於余余與公喬梓爲道義交有年公生平大節亦惟余知甚悉非余其誰銘公者按狀公諱銓別號衡宇其先江南武進人也永樂間始祖太公從龍北上遂卜居於良邑之魯村數傳至尙賢有隱德以子鑽貴贈昭信校尉錦衣衛實授百戶是爲公父生七子二女公最少公幼而穎敏儼然有成人之志初受博士以父兄早逝稱家督不獲成業歲丁未援例入太學辛酉考授鴻臚寺序班非公所好也公家世素封至公持以勤儉益開大之諸子孫旣衆教以正業延名宿爲之師崇禎改元長君以恩選入對旣而考中縣令公不使謁銓謂長君才堪大受曷小就爲丙子次君舉賢良謁選山東陽信縣令公勉之曰忠君愛民此日將見之行事矣壬午冬陽信不守次君以死殉訃至家人痛之公曰吾兒盡

命報國得死所矣夫何憾以此見公之曉然於大節也及奉旨褒恤次君贈僉憲公如其官歲甲申大清定鼎選任賢能有司重公德望數行徵聘公力辭不就曰堯舜在上丞宜攀鱗附翼奈暮年善病得爲太平民足矣所以養吾拙也易曰高尚其志非公之謂與丁亥冬戊子春連舉鄉飲大賓鄉人咸欽之羨之姪孫環丙成舉於鄉諸孫暨曾孫輩亦多人鬻宮高列知公之德者咸謂積善宜昌今茲振興伊始行將光大其門而公乃遽爾仙逝矣公生平質恪無矯揉不安言笑而和氣溢於其顏卽之如坐春風中也性孝友蚤失怙恃事諸兄嫂如父母諸兄歿撫姪猶子及孫曾日衍同居如故宗族鄉黨無間言自奉至儉素而於恤孤濟難助婚殯死諸事則罔不竭力厚施甲子歲里書張姓者有負於官至賣妾鬻子償之公代爲完納使得復聚而絕口不道若惟恐人知者丙子兵變有竊得域郭世松等誤拾軍營遺牛兵官視爲奇貨所求不遂將殺之公出資以贖其死戊寅兵馬雲集食不克給公出穀五百石草三萬束有司列之奏章得旨給敘庚辰歲凶人相食公煮粥賑之頻年身犯兵劫而公盡力經理罔墜家聲其德之不可泯者如此銘曰孔懷是篤德之光樂善無

良鄉縣志

卷八藝文志 志銘

六一

懈性之良正直是好行之芳後人克昌澤之長厥石永藏千秋彰

九春楊公墓志銘

公諱之柄字栢梁號九春順天府良鄉人系自晉太傅叔譽食邑楊氏得姓歷漢唐宋代有顯者迨明有諱斌者晉之潞城人隨永樂北征遂家良鄉仕昭信校尉興州中屯衛百戶斌生信信生勇勇生琮琮生秦號雪堂正德丁丑進士奉政大夫四川僉憲前福建道監察御史諫南巡廷杖直聲振天下雪堂公生守直守直生尙文尙文生三聘卽公大父由歲進士官兩當教諭博學有行義著有志道集行於世生公父繼先食諸生餼以公貴誥贈寧波府知府配劉氏贈恭人公以己卯順天鄉進士於甲申除稷山縣知縣陞刑部清吏司主事歷員外郎中陞寧波府知府卒於官公性直而通敏以厚處事一以是非爲斷不徇人毀譽曰行吾所安而已久之無不心服者公尤能處不易與之人使相感而化無間言然樂其坦懷不見矯異以及汎愛敦篤交友出於至誠雖心別賢愚而博無涯涘不記過其天性然也爲文筆不加點滾滾而出無不疏宕適暢可喜其敏妙殆如其人山東黃公家瑞以舉子業名家令

公邑一見嘆爲奇才黃文力追西漢少許可而獨心折公更自以爲不及其後讞獄之文必公成之邑侯嘗曰吾堂可無吏吾幕可無客亦可想見其概矣功令課諸吏文辭公獨喜援筆立就主者大悅服其文章馳騁皆此類若習煩劇應倉卒咄嗟立辦卽公亦有不自知其所至者甲申筮仕稷山令初下車聞前某賢公慨然曰居官固當如此矣稷當瘠瘠後公撫字甚周用以全力其大者請蠲荒地逋糧三萬餘兩減舊額之半編邑戶三十六里爲廿四里均役輪差以故賦薄徭輕民至今賴之甘棠之思勒貞珉不朽蒞比部佐以輕典所全者居多曹郎例分覽章奏一字失簡則有堂責人多厭苦之公封繳獨先卽同官直日輒私託公公爲兀坐署中代閱之無倦容曰吾卽以此習勤且諳諸故事不亦愈乎故其守甯波也凡六年精密宏達處盤錯如迎縷解如率下屬除吏弊裁差擾折訟獄懲豪猾寒私請繕橋梁餉兵賑荒弭盜之類不可更僕數其難尤在軍興舟山之役大師旁午時寮員俱乏諸備糗儲菱造舟治甲百務畢萃公身無足爲公困者公目矚耳聽口答手揮環中四應不病民而事舉濟甫暇又集俊髦多士校文藝鼓舞不衰所以名魁大元皆出公門人爭

良鄉縣志

卷八藝文志 志銘

六一

豔稱之尤不可及公初至郡時浙大吏風聞欲廉某令命公得其事公曰良令也不可大吏重傷公意又命別道監司示旨必欲廉其事公又曰不可令竟賴以全其持正不阿又如此嗟乎使入佐天子進退人才秉鈞補袞其裨益何如也庶幾哉古大臣之風矣惜也公才百未竟一而公卒卒之日城門卒若聞公阿殿而出者或云見公從騎入廟故公歿而民思之哭之哀易公祠爲廟歲時歌舞於前如公生焉事聞撫軍秦公悲悼甚卽爲入名宦其公之志也歟撫軍檄云易簣之日人皆巷哭良爲實錄云公廉而好施予祿入咸分贍宗黨無私藏生平未嘗有苛刻之行而理所未可則確乎不拔毅然不敢犯溫恭如不勝至義氣自許慷慨又有過人者若公者吾真無間然矣公與余年友媼親共賢書十八載公勤其官以歿余時方旬宣西魯未及執紼爲痛閱歲兩令嗣扶柩來都謀葬事持狀丐余一言余素愧不文然知公之深莫余若誼何敢辭灑淚濡毫而亦豈能遂盡公之萬一也哉悲夫公生萬歷丙戌九月初五日寅時卒順治丙申五月廿二日己時得壽五十有一配孟氏累封恭人子三長于廷廩生娶江西建昌道李公赤城女次在庭庠生則娶子女也次華庭公

遺腹側室李氏出孫男起泰開泰在庭出復泰于庭出孫女一亦在庭出皆幼葬于寶店之原爲之銘曰公之化古之類不知公謂公才邪以薄古之衰讀斯文如公來

表

楊烈婦墓表 道光十二年

知良鄉
縣事 李宣範

烈婦楊氏者良鄉縣王志福之子同縣楊福亨之妻也王世業農氏年十七歸於楊事舅姑無失禮舅楊玉歿後奉孀姑李孝養尤至既福亨以病卒烈婦誓以身殉終念姑年老無他子遺孤莊兒甫三歲乃忍死上事邁姑下撫弱息誠不忍令夫之有遺恨也父志福哀其年少失偶且貧無所依乃令之歸微以言諭之烈婦不應志福又謀於其姑姑意允乃改擇人行有日矣烈婦給其父求歸祭夫墓父不疑也歸即乘間自縊比人救之氣已絕年二十九歲時道光七年四月也閱五年余奉檄攝縣事縣人以余之激揚名節也始以其狀聞且請刊石以紀嗚呼烈婦詎欲以烈顯哉烈婦不死於夫死之日其身本可以無死迨至其父其姑之意不可回非死不能明

良鄉縣志

卷八 藝文志 墓表

六二

其志乃毅然死又不欲以己之死使人議及父與姑而從容乘間以死則其志尤足悲者嗚呼烈婦詎欲以烈顯哉烈婦生農畝間未嘗讀書明大義非其天性貞亮有不可奪之志而能然乎哉乃系以銘曰赴死易撫孤難慷慨從容義則一烈婦雖死生烈氣此石可磨心不滅

呂公師臣墓表

先人一生潛德爲人子者不能表揚已屬終身之憾事况代遠年湮子孫不知祖宗之遺澤木本水源將謂之何植爲先人立墓表非敢謂顯揚也欲告後人知吾門家法傳自先人耳先考諱清望字師臣良鄉縣學庠生生於嘉慶壬申卒於同治癸酉享年六十有二先考自三十以後不應科舉日潛心於理學以陸象山王陽明孫夏峰諸大儒爲宗座右置諸大儒之書手不釋卷者數十載植成童以後每自塾歸爲指示薪傳不嫌反覆至今回憶歷歷在心且事親至孝事吾祖考吾未及見事吾祖妣吾目覩者十餘年植年少長思以先考之事親者事親深愧未能殊多抱憾然年踰六十家計艱難宗族不和諸多逆境以故所有著作皆未成書庚子之亂又遭兵

癸生平文字蕩然無存爲人子者念之而心痛焉先妣賈太孺人入門未踰年而歿生前淑德未及周知繼妣宋太孺人生三子二女植其季也長兄棟十八入泮二十有七以疾終次兄樑少課讀長務農今已八旬身猶康健兩姊皆歸名族載於宗譜者甚詳兒輩飲食起居先妣異常愛護然偶有過失則督責甚嚴兒輩終身循謹遵母教也且治家以儉待人從厚鄉鄰宗族至今稱道弗衰焉植今七十二歲矣回憶雙親猶似瞻依膝下謹爲墓表欲使後世子孫知先人之潛德與先人之家法也

民國十二年七月男植謹表

詩

清聖祖仁皇帝詩

幸宏恩寺

解夏清襟陌上塵孟蘭大善見姚秦臨風洗鉢龍池雨凝露舒蓮瀑水濱送節雙輪應夢相收成萬物足深淳窮通莫問老僧語一任平生今古津

良鄉縣志

卷八藝文志 詩

六四

高宗純皇帝詩

癸巳暮春上澣閱金門閘作

渾河似黃河性直情乃曲順性防其情是宜機先燭而此尤所難下流阻海屬殺盛蓄厥微在洩復在束金門做毛城減漲資滲漉然彼去路遙謂毛城鋪此則去路促關下自黃家河分支由津水窪窪僅一遙者尙迴瀾使減下之水澄清緩瀉故資宜洩百四十餘里路近勢促故易停淤之利而無他患非若渾促者橫流速斯誠非善策驚見心粥粥亟籌救急方謂當挑溜成倒勾之勢難驟挽命於閘上作挑水壩逼其迴倒勾抵金門餘溜俾歸谷非不圖屢閱終弗如親目然予試絜矩九寓廓員幅一人豈徧及滋用增惕慙

閱永定河作

取道閱河干浮橋渡廣灘汎凌過竹箭水潦未桑乾四載由來仰尾閘今度看時以下口

應壽疏濬故渡敬繩仁祖志永定河自皇祖時始永定冀安瀾河繞道閱之

又閱永定河隄因示直隸總督方觀承

水由地中行行其所無事要以禹爲師禹貢無隄字後世乃反諸祇惟隄是貴無隄

免衝決有隄勞防備若禹豈不易古今實異勢上古田廬稀不與水爭利今則尺寸爭安得如許地爲隄已末策中又有等次上者禦其漲歸漕則不治下者卑加高隄高河亦至譬之築寬牆於上置溝渠叶行險以徵幸幾何其不潰胡不籌疏濬功半費不貲叶因之日遷延愈久愈難試兩日閱永定大率病在是叶無已相咨詢爲補偏救弊下口略更移取其趨下易培厚或可爲加高汝切忌多爲減水壩亦可殺漲異取土於河心卽寓疏淤義向來河臣治隄率以加高培厚爲請朕以培厚尙可加之隄外朕謂就近取隄外之土以益隄雖增而地愈下宜河中有居民究非久長取河中淤出新土用之以培隄卽寓濬淤之義似爲兩得

又閱永定河

永定本無定竹箭激濁湍長源來塞外兩山東其間挾沙下且駛不致爲災患一過盧溝橋平衍漸就寬散漫任所流淤沙每成山其流復他徙自古稱桑乾所以疏剔方不見紀冬官一水麥雖成亦時災大田因之創築隄聖人哀民艱行水屬之淀蕩

良鄉縣志

卷八藝文志 詩

六五

漾歸清川其初非不佳無奈歷多年河底日以高隄牆日以穿無已改下流至今凡三遷前歲所遷口復歎門限然大吏請予視蒿目徒憂煎我無禹之能况禹未治旃詎云其可再不過爲補偏下口依汝移目下庶且延復古事更張尋思有所難

庚辰二月二十七日郊勞出征將軍兆惠富德及諸將士禮成紀事

京縣郊南親勞軍

園壇陳纛謝成勳出師本意聊嘗試

西陲之役始以厄魯將諸台吉率衆款附請兵甚力我喀爾牧圍勢不可以錯處滋患無寧及

其鋒而偏師嘗試時計因其地以撫之故于類舊命將之典概未舉行詳具乙亥告成碑記茲準夷旣平而回中諸部以此戡定寅荷上蒼宗社鴻麻非敢謂先時逆

此也秦凱今朝備禮文釋甲弢戈罷征伐論功行賞策忠勤膝前抱見尙經歷國初

出征將領成功還皆行抱膝一瞬五載戚以欣

同心萬里那暎遠畢竟歡言賦采薇勇將歸來兼福將蔽衣著得解戎衣漫稱偃武

修文日恐卽嬉文恬武機飲至寧誇暢和樂持盈益勵愼幾微

清仁宗睿皇帝詩

癸亥孟冬中澣過盧溝橋作

上陵冬日渡蘆溝拱極通衢路必由納稼慶豐穫嘉穀安瀾沐澤靜洪流雲開晚旭
升高樹霜落寒潮淨遠洲策馬沙岡轉村店又看塔影出城頭

癸亥孟冬下澣曉行卽景

遠山現天末平林挂曉月驅車度霜皋霜輝逼毛髮村鷄呷喔鳴羽衛方明發古岸
積白沙淺水薄冰斲四時運不窮輪轉無休歇漸覺夜景澄晚旭騰玉闕

乙丑季春中澣

第一衝繁郡思艱厘寸衷官難免苛政民總仗年豐飢溺懷胞與痼瘵憫困窮省耕
春已暮勤政勅羣工

戊辰季春中澣惠濟廟瞻禮畢過蘆溝橋作

永定衛京邑

神祠致瓣香安流普惠澤顯應現榮光欄楯猶獅伏康莊駿馬驤疎林籠塔影廿里
近良鄉

戊辰季春中澣行宮晚坐

良鄉縣志

卷八藝文志 詩

六六

近依帝里境衝繁城北行宮挹綠原疆吏迎鑾畫三接咨諏民隱採羣言
西林斜照輝庭除樸室清幽文景舒容膝心安養幾暇芸編玩味樂三餘
己巳季春上澣

近京首邑稱難治供應往來財力疲賢吏居官不擇地龔黃政績在人爲
麥色初盈畝畝間一年生計軫民艱省耕布惠寬租賦休息先從苛政刪

己巳季春上澣過蘆溝橋

大川來渾源名州無定今永定拱極跨石梁兩岸百丈亘春水漾中泓碧波含清澄去
歲幸津門下口疏滯凝一貫皆暢行安瀾如響應治河首敬勤南北理印證

丙子季春

神京首善鄉民俗果淳良不染澆漓習尙知禮義防殫心化怪僻竭力飭官常不息
勉勤敬庶幾治具張

戊寅季春上澣

豐台啓征轡廿里渡蘆溝疊疊山屏秀依依柳線柔衝繁推首郡襟帶近皇州習俗

尙淳樸勗哉德化修

清宣宗成皇帝詩

柳色 辛巳季春黃辛莊行宮作

柳枝三起更三眠一雨初晴色借煙萬縷低垂空翠裊幾行遠映嫩穠妍輕能引緒
風微拂暖易抽萌日乍穿已是可憐春在望還看遙綠滿平川

壬午三月九日

緩轡西郊往事悠驚心蹕啓暗增愁已傷秋孟程期阻初值春三祀曲修乍覩林巒
青靄合徧看麥隴綠芽抽銜恩日凜難承述抱痛終身豈解憂

癸未季秋十七日啓蹕作

曉策駛雲名馬出阜城驚時霜露倍傷情平沙細靄桑乾渡孺慕終憂易水程觸目黍
禾被澤潦關心堤堰復經營亟宣疆吏求民瘼在抱痾瘵夙夜縈

黃新莊行宮晚作 癸未季秋

雲淨天空萬象秋鐙殘行館夜悠悠衰林拉瑟閒中慨寸草離披望處愁省歛省耕

良鄉縣志

卷八藝文志 詩

六七

思夏諺時風時雨問西疇興懷明發增依慕繼序深恩慄未酬

丙戌二月啓蹕作

不寒不暖豔陽天曉策飛霞名馬緩著鞭麥秀三春三輔慶雨濡寸草寸心牽峰腰古
刹雲中畫沙際花村柳外煙西望橋山增孺慕時光若鶩歲華遷

戊子季秋蘆溝曉渡

西望縈懷抱蘆溝策馬過嶺霜催落葉濁水斂長河告祭精誠展瞻依感慨多豐盈
看處處普穫九分禾

戊子季秋黃辛莊行宮卽事

霜降平皋顥氣清晚來行館亦怡情房山晴靄無邊秀易水秋風第一程乍見疏林
葉初落最欣長畝麥皆萌幸恩債事真堪恨成事翻然又不成

感言 戊子黃辛莊行宮

父母俱存慟不禁兄弟無故更難尋誰知樂境成憂境須向塵心悟道心葉落枝頭
詎有意雲流水面豈留陰一憑造化窮通理世態人情漫見侵

無無有有互生生滅伊何較重輕春煦明來含穢濁秋霜陰始凜枯榮當頭月滿
思完璧守口風清想太羹八萬四千眞實法不齊齊處豈關情

庚寅三月十四日恭謁西陵啓蹕卽事

春露秋霜暗愴心西瞻珠阜慟難禁蘆溝入望經行熟易水縈懷歲月深寸草含情
開廣陌長楊引恨冒疎林乘時甘澤眞優渥積雪晶瑩映遠岑

辛卯二月十八日啓蹕作

仲春緩轡趁朝行西望珠邱愴寸情列障峯巒雲乍歛含滋畎畝麥皆萌塵消廣陌
和風拂柳映遙村淡靄橫曉度蘆溝謁神宇安瀾永賴惠群氓

甲子季春恭謁昌陵泣述

考妣深恩何以報誰知老大更增悲初攜幼子祈慈佑皇四子皇五子均隨侍祇謁
珠邱成禮祥呈姬媵福衍孫
枝慈佑無疆泣龍泉峪萬年吉地密邇昌陵不獨龍脈蜿蜒扶與
感曷其有既重卜龍泉展孝思積慶而據恭劍之本展水木之思庶稍伸予小子
依依膝下愴憶當年叨玉膳泣逢今日舉金卮哀哀膝下眞如昨惕厲承先勉有爲
之素志耳

文宗顯皇帝詩

良鄉縣志

卷八藝文志 詩

六八

渡蘆溝作恭依皇祖詩韻

芳菲節過渡蘆溝策騎含辛蹕路由隴麥最欣沐甘膏督臣已報靜凌流近日已閱
訥爾經額
凌汎安
瀾奏報網緼晴靄分高岫潏沆春潮落遠洲指點蒼蒼煙樹外浮圖遙望出城頭

十月十四日啓蹕渡蘆溝橋感賦

物候匆匆廿七月從依無奈展西行鳴鞭卽目悲常結撫序驚心淚暗傾日映疎林
輕靄合冰和流水遠沙平湯湯南下波何駛拜祝瀾安抒悃誠

固節驛

李嘉賓

良有固節驛云何得此名賢哉葛王妃挺挺女中媿網常泰山重一身鴻毛輕行矣
死傳舍皎皎從一貞從容就義難確哉古人評女子見何眞臨難處之亨奔命以存
夫殺身而求誠擇術得中道寸心千古明烏祿得再世衆推帝東京人稱小堯舜境
內樂昇平燕山有佳色燕水有餘清山高節不朽水遠流芳聲乾坤氣磊落驛名永
以旌

黑狗臺

君不見良鄉城南黑狗臺爲報主人身且埋野火延燒主人醉鹽溝水遠走千回泡
得水來沾近草惟恐王恭被火煨又不見王恭酒醒黑狗死始知延燒因狗止仰天
號泣狗何辜防夜隨身將誰倚思量何以報狗勞爰築葬臺高百尺嗚呼狗因人養
甘殺身人念狗勞意何真酬功恤死主人義食食分憂黑狗辛言官直諫不避刃邊
將殪敵身野殪龍逢冒死報君恩遠巡力竭睢陽鎮此義後人多不明一念惟知利
祿營人靈物蠢天賦性物厚人偷真可病狗兮狗兮衛爾主我且羨爾獲死所爾死
雖悲爾名馨愧煞千秋臣與僕

良鄉行

雲南樊巍明邑令
舉人樊

金臺西南七十里一塔寥寥紀燎罔襟喉南北當燕谷水似琉璃波有光各方朝彤
闕千齡樂未央八蠻通道稱朝貢萬國款塞紛來王鮮芝來五嶽玉米走蘇常金磚
與醮蓋騫茗并魚缸西番載皮革南緬供象房中官絡繹馳丹轂侯伯新封就土疆
肩輿長百計飛蓋總冠裳箱奩籠錦繡笥過邱岡武夫排道路塵埃蔽穹蒼錦衣
照閭里玳筵誇故鄉朝營千戶宅暮置萬戶莊百年富貴如一日歌舞寧知春夜長

良鄉縣志

卷八藝文志 詩

六九

吁嗟京城地盡是利名場更有皇華使驅馳日夜忙朝烽夕燧報聲息羽檄黃符催
運糧縣官驛遞衝風雪滿頭鬚鬢結冰霜迎送身勞苦敝垢着冠裳一朝黃金盡身
體被鞭傷挪移還惹罪需索倒私囊家家門巷皆深閉一邑官吏總逃亡午夜沿街
索燈火關文挂號空徬徨過客咸噴不應付可鄰苦楚誰能管父竄霸州東子徒西
山陽戶口六百丁魚遊釜中湯孩提已編役衰老差還當一萬三千協濟數三分得
一那賠償官錢私債頻年借前官後尹真淒涼寄語四方遊宦客選官切莫選良鄉

贈良鄉老友麗天陳三兄畫師贊

僧慈海

麗天老友七十一目光如電鬚如戟雄姿抖擻神飛揚齒危髮禿軀七尺柔不茹兮
剛不吐貧不移兮勢不屈草堂有母九十六菽水承歡常繞膝中歲糟糠已悼亡甘
同孤雁無倫匹結交羞殺襪襪龐千金意氣爭揮霍排難解紛薄雲天郭解朱家勢
若失有時肝膽向我披談天雕龍應捲舌波濤口海氣如虹不知四座驚塵俗一聲
長嘯天地空筆走龍蛇鬼神泣篆籀斯隸腕底生光怪陸離爭出沒忽爾大草更顛
狂張芝懷素皆陳迹金電難掣手中蛇猾兔何妨鷹眼急酒酣乘興作丹青任情潑

墨撫拘束霎時活現三神山頃刻淋漓十丈幅海立嶽飛奪化工虎頭黃鶴應屏息
仰天把盞發高歌激昂感慨人不識漸離擊碎關中筑灌夫欲罷長干曲男兒有志
復有才豈意返遭造物嫉有骨肯教世俗憐往往罄懸空四壁蒙袂豈甘嗟來食途
窮不效狂生哭踽踽時露出世風子子獨挺孤高質燕雀啾啾鶴一聲羣芳馥馥松
孤直我今爲子寫平生書成寄子須三復眼中知已剩無幾山僧髮禿君鬢白破膽
揚眉一長歌老驥何甘櫪下伏

琉璃河

宋范成大

烟林葱蒨帶回塘橋影驚人尖睡鄉陡起褰帷措病眼琉璃河上看鴛鴦

良鄉

新寒凍指似排籤村酒雖酸未可嫌紫爛山梨紅縵棗總輸易栗十分甜

天賜夫人 陵川集

元郝經

八月十五雙星會花月搖光照金翠黑風當筵滅紅燭一朶仙桃落天外梁家有子
是新郎芊氏負從鍾建背爭看燈下來鬼物雲髻欹斜倒冠佩須臾舉目視旁人衣

良鄉縣志

卷八藝文志 詩

七〇

服不同言語異自說吳門六千里恍惚不知來此地甘心肯作梁家婦詔起高門榜

天賜幾年夫婿作相公滿眼兒孫盡朝貴須知伉儷有因緣富貴莫求貧莫棄

弔望諸君墓

明湯顯祖

昭王靈氣久疎蕪今日登臺弔望諸一自蒯生流涕後幾人曾讀報燕書

楊茶菴僉憲闔門殉節

清王士禛

諱三知良鄉人順治丙戌進士神木道僉事參
將孫崇雅叛同妻妾二女赴井死贈光祿卿

西來鼙鼓震秦川神木城頭火夜然直向重泉尋八口居然一死動三邊飛書大將
論功日嚼齒孤臣入地年髣髴井榦明月下苔痕零落聽啼鵑

樂毅墓

誰弔望諸君白楊吹古墓魂魄猶首邱不葬邯鄲路流涕遺燕書隆中有餘墓

早發舊店聞流寇入於琉璃河

舊店即
舊店

白日橫孤劍清霜起二毛曉雞催客去宿雁向人號大道多荊棘微官止敝袍狐鳴
何處火昨夜北風高

良鄉霧

袁枚子才

不雨征鞍溼方知霧裏行曉花難辨色溪水但聞聲對面人千里終朝天五更前程原似夢何必太分明

次日霧更大

連宵駝背錦模糊寫出洪荒一幅圖此際羣仙高處看可知下界有人無

良鄉旅店題壁

陶元藻篁村

滿地榆錢莫療貧垂楊難繫轉蓬身離懷未飲長如醉客邸無花不算春欲語性情思骨肉偶談山水悔風塵謀生銷盡輪蹄鐵輸與成都賣卜人

和前作

袁枚

天涯鴻爪認前因壁上題詩馬上身我為浮名來日下君緣何事走風塵黃鸝語妙非求友白雪聲高易感春手疊花箋鈔稿去江湖沿路訪斯人

喜晤陶篁村有序

壬申過良鄉和篁村題壁詩徧訪不知何許人後十餘年勞觀察宗發來云

良鄉縣志

卷八藝文志 詩

七一

渠宰此邦同制府方公見此詩而愛之禁止店主坊去今又隔六年矣在梁方伯席上晤篁村方知蕭山人也姓陶曰元藻告以故陶感知已恩而悲勞方兩公之已亡重賦二詩附錄於後

當日相思村店壁今朝相見菊花天同生此世原非偶聽說前緣各惘然有數才人天地內無端良會水雲邊也虧彼此吟懷健耐得人間十七年

感舊二首

陶元藻

匹馬曾從燕薊驅橋霜店月已模糊人如曠世星難聚詩有同聲德不孤自笑長吟忘歲月翻勞相訪徧江湖秦淮河上敦槃會應識今吾即故吾
三間老屋夕陽村底事高軒過此門飛蓋翠搖新蘸墨華燈紅照舊題痕不教墮畫傭奴易便勝紗籠佛殿尊惆悵憐才青眼客幾番翦紙為招魂

料石岡

金源紀事詩
即燎石岡

青浦湯運泰 虞樽

本紀貞元元年十月丁巳獵于良鄉封料石岡神為靈應王初海陵嘗過此祠持環玦禱曰使吾有天命當得吉卜投之吉又禱曰果如所卜他日當有報否則毀爾祠宇投之又吉故封之蔣一葵長安客話良鄉城東里許有石岡石赤色如燎可以取火因名燎石岡舊有佛塔亦名塔岡

楚王投龜遠詬天世無此狂三千年煬王區區冀余畀凶焰欲到乾溪前石岡山神
心欲弔文武才能徒自耀面目雖黑袍欲黃博得他年靈應號嗚呼靈應實不靈大
定登極降海陵不然自誇獲神佑子虛环玦皆無徵君不見小鹿三大鹿一發矢橫
從門脊歇鐸瓦酬天自述空屑屑

良鄉哀

后妃傳世宗昭德皇后烏林答氏聰敏孝慈容儀整肅世宗在濟南海陵召
后來中都后念若身死濟南海陵必殺世宗惟奉詔去濟南而死世宗可免
謂世宗曰我當自勉不可累大王也召王府臣僕張謹言喻之曰汝王之腹
心人也為我禱諸東嶽我不負王使皇天后土明鑑我心后既離濟南從行
者知后必不肯見海陵將自為之所防護甚謹行至良鄉去中都七十里從
行者防之稍緩后得間即自殺海陵猶疑世宗教之使然世宗自濟南改西
京留守過良鄉使魯國公主葬后於宛平
縣土魯原大定二年追册為昭德皇后

從姊妹聯袂去諸宗婦深宮住義烈從無一人著定哥來殺嗚帶堂古來贈金袋情
誼有無總賈害妾身生死葛王妻入宮恐為巢刺妃琉璃河頭一照影不忍更食金
粟梨蕭條古驛真清絕皇天后土心如結瓣香自有東嶽知固節之節凜霜雪

良齋午日

雲間 沈炎曦 方烈氏

良鄉縣志

卷八藝文志 詩

七二

時逢佳節署逢良槐影參差滿畫廊眉壽不須長命縷清平何用辟兵方垂簾寂靜
無人到啓戶蹣跚有燕忙荷葉田田盆內起碧筒蒲酒興初狂

良齋七夕詠同事董顯之東涿署周載公

流光荏苒又新秋久雨初晴景倍幽共道雙星今夜渡莫因觸緒動離愁
簾前新月掛銀鈎金井梧桐影動浮賜巧穿針何處事且吟短句賀牽牛
停杯翹首望銀河天上人間誰恨多歲歲相逢猶恨遠年年契闊更如何

良署中秋

秋色平分夜氣清喜逢苦雨值新晴長空萬里浮雲淨大地千林落葉橫颯颯西風
經夕起翩翩北鷹又南征旅中令節無奇策惟有開樽對月傾

暮秋感懷

秋色驚人慘澹餘繽紛落葉滿庭除風聲欲撼牆邊樹鴈影難傳天際書幾度星霜
青鬢改何時羈旅悶懷舒茫茫鄉國雲山外渺渺萍蓬近帝居

良齋九日 再同董顯之城郭登高望月口占

鼓興登高去復來臨風凝望暮烟開五雲深處瞻天闕月席權時藉草萊隱隱砧聲
從北至重重山色向西迴慙慙共坐邀新月照我茱萸酒一杯

小春望後四日別中都署齋

入夏臨良署于冬轉范陽往來無定跡行止總他鄉乍見槐浮綠俄驚菊褪黃流光
如迅使撫景自蒼忙

良齋午日和沈方烈原韻

四明董元謨顯之氏

寄棲花署覩循良金石歌聲出畫廊無限幽思隔故里難消壯志在他方一庭快聚
飛觴醉四坐聯吟走筆忙最愛綠陰相對處科頭箕踞共清狂

和前題原韻

四明周嗣繡載公

綠舞庭陰節候良薰風拂拂度迴廊心馳故國人千里影對空齋天一方蒲葦漫斟
綠底醉冰臺徧插爲誰忙因思獨醒遺踪在弔古憑今興薄狂

又和

何須筆墨羨精良百轉推敲繞畫廊佳句每生辭故里芳辰偏惜寄遐方榴花映日

良鄉縣志

卷八藝文志 詩

七三

爭含媚槐葉迎風不住忙我本借枝憔悴客莫禁撫景一時狂

過琉璃河

德少司空齡

白髮蒼顏老侍臣又隨豹尾踏芳塵琉璃河畔毵毵柳應識三朝扈蹕人

燎岡古塔

邑人陳璠

偶因訪古上高岡遠映斜陽塔影長隱約重樓雲外出玲瓏七寶霧中藏昔年題詠
邀詞客今日登臨禮梵王果是真身埋舍利浮圖千載歷風霜

巨浸東滙

一水東流望欲迷發原來自太行西驚濤湧雪歸滄海激浪淘沙擁大隄虹影千秋
成砥柱鯨波幾處滙清溪風中聽罷漁歌晚兩岸垂楊似剪齊

城脚雞鳴

黃文

飛聲能破曉雲紅何事埋頭阿堵中想是避秦人共隱桃源深處路能通

登良鄉城遠眺

楊嘉樹

孤城夕照登臨好薊北春風氣似秋四野正逢新雨足千家又送晚砧愁江山到處

自今古轍迹隨緣任去留爲喜趨庭閒縱目長安東望白雲浮

玉河新柳

甯國琮

靈和當日近天顏嫩綠行人未許攀弱似腰肢籠曉霧色如眉黛映春山鶯爭煖樹
風中嘒燕啄新泥水外還自是皇朝恩浩蕩柔條垂處沐波間

其二

春回黍谷日初遲搖曳隄邊拂嫩枝遠映金門籠瑞靄近依畫舫蘸清漪曉沾微露
風絲颺夕帶寒煙月影移嫋娜芳姿臨碧水纖纖如畫鏡中眉

玉河新柳

甯越

玉河兩岸拂垂楊輕舞春風漸染黃枝隱新鶯聽宛轉影隨乳燕共飄揚隋隄掩映
金鋪色灞水輕盈翠帶長碧浪縈回依御苑柔條嫋嫋趁流光

燕谷長橋

郭秉聰

輪蹄南北阻驚濤聖主當年建石橋一帶長隄橫綠野四時佳景漾青霄樓臺倒影
波中印楊柳因風鏡裏搖翹首更疑雲路近行人絡繹度虹腰

良鄉縣志

卷八藝文志 詩

七四

燎岡古塔

燎岡突兀邑城東古塔玲瓏聳碧空絕頂輕籠朝靄白深林遙射夕陽紅北瞻皇極
風雲會南望寰區雨露同隋代至今留勝蹟登臨惆悵憶前功

鹽溝雪浪

西來白水日潺潺流入鹽溝不紀年急浪翻時疑湧雪微波漾處欲搖天圓荷點點
跳新雨弱柳依依帶晚烟偶步城南閒眺望隄邊尙少釣魚船

城脚雞鳴

繚垣何處有雞鳴起舞徒教慕祖生爭似荒村方叫旦妙如空谷自傳聲北驚皇路
燕臺客東並高岡雁塔名此日登臨尋舊迹蒼苔碧草滿春城

崇岡西擁

中都西映大房山晴曉雲開露翠鬢近接太行雄帝鎮遠觀滄海入仙寰每逢吟眺
襟懷灑久未登臨屐齒閒莫怪古今稱勝境層巒突兀水潺湲

巨浸東滙

沙闕雲深古渡濱長河東望浩無垠數聲欸乃江天曉一曲滄浪月色新行客每愁風浪阻輕舟乍過水紋皺巨川欲濟何妨濟試向洪濤去問津

廣陽遺城

漢世膏腴屬廣陽遺城猶自識封疆離離故址生秋草去去流民賸短牆沃野當年稱負郭荒村今日歎窮鄉何人動念關民瘼肯向朝廷上奏章

梁公芳沼

梁公舊業傍蓮池數頃澄波景色奇風遞清香來靜院雨敲殘葉漾芳陂平沙鴻雁驚漁棹淺渚蜻蜓立釣絲都運松阡令草莽誰人仍識狀元碑

燕谷長橋

張環

百里康莊路風烟近日邊龍藏雲裏樹虹落水中天柱古題痕在弓長倒影懸一河當孔道從不礙郵傳

燎岡古塔

玲瓏天外影頂上見圓光拾級尋仙蹟憑高俯女牆碑殘籠靄重鈴語妒風狂赴闕

良鄉縣志

卷八藝文志 詩

七五

輪蹄過應思禮梵王

鹽溝雪浪

獨擅中都勝鹽溝澈底清冰消經雨漲流急湧濤聲水面因風皺波心印月明何年容釣艇一棹蕩孤城

城脚雞鳴

鹽溝環雉堞佳氣萃城隈有響聲斯應無形喙若開循牆音入聽動地韻偕來蹟近燎岡塔搜奇共舉杯

崇岡西擁

咫尺登山路尋幽快賞心晴嵐藏寺塔濃翠落庭陰雨洗千巖淨雲生萬壑深西窗餘夕照松老向風吟

巨浸東滙

滔滔東去水天際下飛湍百代昭神異千秋壯大觀鷗浮隨浪遠魚躍喜波寬終古濤聲急桑乾那得乾

廣陽遺城

城池經劫火曠野望茫茫代遠殘碑在時移古徑荒曉烟啼鳥雀落日踐牛羊滿日風沙蔽蕭騷憶廣陽

梁公芳沼

人往風流在閒情酷愛花荒村留勝蹟秋水湛清華新綠餘垂柳殘紅落片霞梁園名最古此沼可同誇

燕谷長橋

蘇之屏

風日清和聖水遊蔚藍天在綠波浮未雲龍見橫郊野不雨虹飛跨御溝萬國梯航歸孔路千秋砥柱峙中流皇華鎮日馳車馬何用舟人棹度舟

燎岡古塔

玲瓏寶塔峙峰巔仰止中都最占先累級蒼台僧履蹟多年古寺佛逃禪雲開倒影籠隋月風送清音出梵天似欲書空成雁字筆尖高插翠雲邊

鹽溝雪浪

良鄉縣志

卷八藝文志 詩

七六

寒溪鎮日繞城流山水清音此處收影浸樓臺疑海市聲如瀑布出滄州乍看烟靄籠波面渾訝風濤撼石頭萬斛明珠留不住只餘白雪滿鹽溝

城脚雞鳴

昨宵一雨淨塵埃間步城邊踏綠苔舊迹並從燕谷訪清音遠自女牆來地連寶塔晴光射聲雜胡笳暮色回想是避秦留此處隔溪審聽幾徘徊

崇岡西擁

張祖澤

疊嶂層巒列兌方龍盤虎踞起崇岡銜山落月籠朝靄入崦浮雲隱夕陽雨洗翠屏環北闕雪明玉壘映東廊登臨最是新秋好陣陣西風送晚涼

巨浸東滙

西來萬派盡朝宗汨汨洪濤日向東極目山遙瞻泰岳打頭船每遇春風宵深浪湧回寅斗晚霽橋飛過雨虹曉步長隄天際望一輪朝旭浴波紅

廣陽遺城

古木淒涼噪晚鴉變遷那復計年華千村自接皇都近九陌猶存御路斜暮靄松杉

前代寺秋風禾黍野人家遺民向曝談炎漢墟落蕭條贖菜花

梁公芳沼

小沼澄清一鏡開詩人乘興採蓮來紅衣襲日天光漾翠蓋搖風波影迴泊舫晚烟迷綠柳弄花曉露迸蒼苔長安走馬曾簪杏名冠瓊林蓋世才

遊宏恩寺

候選郡丞 楊樹嘉 歸安

為有尋幽興相攜到上方碧雲騰殿古春日漏山光地僻凡塵淨天高祇樹荒老僧勤掃雪茶鼎泛清香

其二

奇蹤到處訪萬象悟來深問法渾無意航間似有心四山皆入畫一水忽鳴琴歸路聞清梵依稀度遠岑

秋日遊郊勞臺

魏瀚

翹首西風送雁來御碑拜讀掃莓苔將軍敵愾紆長策天子酬庸築勞臺自有勳名光竹帛何嫌亭榭沒蒿萊夕陽獨立思前事一任蟲聲唧唧哀

良鄉縣志

卷八藝文志 詩

七七

大水行

薛蔭

邑城東高西窪西門外向築月牙隄以禦水患光緒庚寅五月水暴至潰隄入城壞官舍民房無算

五月晦日天黃昏蛟龍來奪城西門轟然一聲斬關入如山雪浪隨而奔奔流直向城中灌水聲響處人聲亂子呼母兮妻喚夫黑夜紛紛盡東竄篋中衣服倉中粟盡委洪波不回矚死生祇在須臾間孰肯遲留葬魚腹天怒蛟龍雷下擊莽莽黑雲飛霹靂霹靂一震響碎訇雷火如鑿赤壁兵大雨滂沱忽然至空中直瀉江河傾山水欲以城為壑雨水又從天上落二水頃刻丈餘深平地波濤漫樓閣女哭男嚎走不遑行逢急雨倍倉皇暗中泥淖昏難辨蹉跌時時仆道旁淋漓褊體皆泥水望見人家即投止無論神祠與市廛暫庇一椽聊救死我宅水至急隄防杜門塞竇沙盛囊豈料雨水不能出院中室內皆汪洋大雨通宵直達旦水氣昏沈鏡黯淡拚將性命置度外妻孥相對坐愁歎天明雨止慶重生厨中牆倒炊烟斷登高一望慘心目全城水已淹其半填衢塞巷波千頃巷口穹碑惟露頂十家屋宇九傾頽梁棟隨波如泛梗避水歸來淚暗吞臨流不見舊家門此身僥倖雖逃死居室漂搖杳不存更苦

城關相間隔聚而不流成大澤水無去路疏消難何時涸復居人宅城中如此嘆流
離城外田廬更可知聞道蘆溝新決口濁流直欲灌京師嗟吁乎畿輔頻年遭水患
此日奇災尤罕見劫運雖然有定數總由人事干天譴

兵車行

薛 蔭

半夜忽然雞犬驚滿村不斷喧呼聲我從夢中亦驚覺側耳傾聽心怦怦時余投主宿於此
人知我寤向我言其故此是縣吏傳兵車並非盜賊君無懼我聞其故心稍定語舊
轉覺言難罄借問此役始自誰始自當年陳縣令憶昔邊方初用兵京營禁旅曾南
征車馬僱覓有定價耕市不擾民安生自從陳令宰吾土居官不識民間苦按戶派
車創新章遂輟耕耘載行伍此令一出里胥狂大索橫搜徧各鄉無論敝車與羸馬
盡行簿錄到公堂一朝有信官兵至縣中紛出傳車隸催車更比催科嚴無車立將
人拘繫我思皇朝教澤深斯民莫不解尊親豈辭輸鐵馳驅苦不盡閭閻報効心其
如過境兵無數趨公未免妨農務師行不惜供奔走田荒何以完租賦更苦隣封交
替間扣車不放吏爲奸若非傾囊納賄賂往往車去無時還嗟吁乎田車竟作兵車

良鄉縣志

卷八藝文志 詩

七八

思長途日日供迎送縣中有兵常往來鄉間有地難耕種於今此役逾十載相沿已
久誰能改後任各官皆知其病民然格於時勢未能猝議改革惟祝今日車中兵早早歸來齊奏凱

城南翁

薛 蔭

長晝苦寂寞門外閒游嬉有翁拄杖來蹊蹠行遲遲老骨瘦如竹嶙峋撐空皮小憩
綠陰下俯首顰雙眉似含無限愁感歎頻嗟咨我憐翁憊甚長揖前致辭問翁何若
此敢請細陳之我問未及己翁聞雙淚垂自言家城南行年將古稀老妻早爲鬼鰥
居形影依前歲江南戰一子充王師痛哭出門去屈指三年期平安信久隔生死心
常疑昨夜夢魂來言貌甚支離殺場鋒鏑險想已作輿尸兒死亦無傷命薄自怨伊
可憐媳青年膝下尙無兒媳性最賢淑守志甘勞贊助我謀饗殮紡織日孳孳荒年
糧價貴米粟抵珠璣費盡三夜功難供一飯資亦有數畝田無人去平治更兼天亢
旱滿地生荊茨豈料催科者猶自來窮追詎敢抗國課其如遭饑饉告以艱苦情不
聞如聾癡縛去見官府撲到立鞭笞竹杖一著肉痛澈如鍼錐壯年亦難受何況筋
力衰于今歷市月血肉猶淋漓殘軀料難久不日溝壑遺嗟吁蒼蒼天好生常仁慈

何罪干其怒困苦至於斯我聞此老言不覺心淒其爰操三寸管紀以五言詩爲問
當路人此情知不知

良鄉

舉人呂植

出都南望路茫茫古邑猶存漢廣陽遺老尙能談舊事嘉名今已易良鄉東奔濤浪
桑乾水西擁雲山古大房寶塔玲瓏臨佛殿仙莊隱約見宮牆浪如湧雪鹽溝淺橋
似飛虹聖水長秋入燕山丹桂馥風生梁沼白蓮香新寒下馬沽村酒前路聞雞踏
曉霜郊勞歸師陳甲冑賓來旅館話梯航孤墳弔客頻揮淚古驛賢妃幾斷腸隋代
招提留古木漢家循吏樹甘棠雨餘大野嘉禾綠春到長隄御柳黃搖曳翠華天際
下崔巍金闕靄中藏睦姻自昔民風厚耕鑿渾將帝力忘萬國來朝瞻使節百年敦
俗勸農桑車疑掣電環城外墩映斜陽峙道旁當日千村稱富庶而今四野歎蒼涼
年來水旱窮簷困劫後田園宿草荒老屋欹斜巢燕雀遠郊寥落牧牛羊一城樓閣
經兵燹萬頃膏腴作戰場市井蕭條憐賈客奎樓傾圮減文光流民失所悲鴻雁聞
亂驚心甚虎狼墟落僅餘祈穀社鄉鄰絕少讀書堂驚濤每慮沙隄潰淫雨何能水

良鄉縣志

卷八藝文志 詩

七九

患防擾攘輪蹄供億苦往來冠蓋送迎忙空懷聖主蠲租賦久未豐年少積倉遺俗
不隨時事改山河猶是舊封疆

哀流民

庚申九月作

舉人呂植

無麥無禾歉歲頻畿南一路徧流民飢寒顛仆情堪憫簞食誰家與乞人可憐蓬門
純孝子親老年衰難轉徙爲戀雙親不忍離數日舉家皆餓死處處荒年誰濟貧夕
陽楊腹淚沾巾飢腸難忍將尋死兒女牽衣哭水濱一家骨肉皆離散嬌兒敢作明
珠看路旁棄擲泣呱呱慈母肝腸應寸斷索食頻來善士門乞憐猶幸此身存他鄉
聊可求生路赤地誰能守故園累人最是髻齡女賣與朱門轉得所只是離別膝下
時囑付一言一酸楚抱子攜妻投遠方就途那有裹餼糧儻爲餓殍填溝壑作鬼淒
涼悲異鄉不見人憐淚暗灑骨瘦如柴棲曠野不如紈袴籠中禽不及豪家廐中馬
瓊筵豪飲酒中仙一席珍羞值萬錢睹此流離心動否請留餘滴救荒年俠少揮金
輕似土青樓日日貪歌舞美人若肯少纏頭分金可救災黎苦仁人早爲窮民計目
前慘狀應垂涕風霜徧野盡哀鴻急與多方籌賑濟恨我書生一策無流民今已滿

皇都自慚未學丹青筆吟詠聊當鄭俠圖

郊勞臺

呂植

大將班師日鑾輿出鳳城翠華雲際下金甲日中明色動天顏喜恩叨御酒榮至今
風月夕如聽凱歌聲

故行宮

前人

雲樹蒼茫處南巡輦路通頽垣蒼靄外古殿夕陽中夏雨苔生綠春風杏落紅多情
天上月夜夜照深宮

崇岡西擁

前人

聳出層巒秀烟霞四面環仙村丹嶂裏古寺翠微間朝吐雲千疊宵銜月一彎中都
名勝地西映大房山

巨浸東滙

前人

一水東南去汪洋壯大觀濤神隆祀典河伯護安瀾浪急噴沙遠冰消湧雪寒燕南
三百里勝蹟古桑乾

良鄉縣志

卷八藝文志 詩

八〇

燎岡古塔

前人

絕頂登臨處玲瓏一塔高西觀秋嶺月東望大河濤雲路昂頭近乾坤放眼豪題名
曾幾輩碧落羨仙曹

燕谷長橋

前人

百里皇華路畿南第一橋烟霞迷澤國風雨度星軺倒影波中印垂楊畫裏搖乍驚
虹一曲晚霽出雲霄

鹽溝雪浪

前人

一帶環城水空明映畫樓晴宵光奪月炎夏冷於秋倒影兼天湧驚濤帶雪流而今
風浪靜清淺賸鹽溝

城角雞鳴

前人

報曉雞初唱登程客已行荒村天欲曙茅店月猶明古木無鴉噪長空息雁聲城中
還擁被朝起但聞鶯

廣陽遺城

前人

弔古荒郊外逢人問故城清時成曠野漢代此屯兵殘壘尋遺蹟孤村守舊名村名廣陽
城滄桑經幾變感昔不勝情

梁公芳沼

前人

當日觀蓮處荒涼賸野池名猶傳宋代愛似學敦頤古蹟詩人弔遺村父老知村名立教
徘徊蘆葦岸瑟瑟晚秋時

望諸君墓

前人

良臣遺骨葬良鄉荒塚巍峨古道傍功敗垂成傷武穆讒言難問感昭王夏侯論繼
春秋作夏侯太初有樂毅論卽墨城將旦夕亡遺恨孤忠難報國千秋憑弔淚沾裳

梁公蓮池

前人

一片蒹葭映夕陽名流千載賸荒莊莊名立教春風馬走長安陌梁公狀元秋雨人居聖水鄉
池近聖水地擬濂溪周子宅景殊芳草謝家塘羨他天賜夫人探妻稱天賜夫人畫舫攜來兩袖

香

琉璃河 四首

前人

良鄉縣志

卷八藝文志 詩

八一

近水遙山入畫圖柳隄閒步踏平蕪忘機日與沙鷗對悔不烟波作釣徒 前人

清溪繚繞映柴門楊柳蒹葭隱一村若有桃花逐流水漁人疑到武陵源 前人

一水澄清藻荇浮垂楊兩岸繫漁舟風帆沙鳥天然畫恨少詩人此地遊 前人

水到村西曲折流青山環抱白雲浮綠陰深處宜攜酒閒數清溪賈客舟 前人

固節驛 有序

前人

良鄉縣署東偏爲固節驛之舊址金世宗之昭德皇后盡節處也世宗先爲噶王
兼濟南尹其妃烏凌噶氏儀容整肅金主亮悅而召之妃曰我若不往禍必及王
然我此行當使皇天后土明鑒我心行至良鄉夜宿此驛得聞自殺及世宗卽位
追稱爲后感其盡節而死終身不再立后矣夫金主亮帷薄不修爲其所脅者皆
甘心受辱妃獨捐軀不惜大節昭然足以光史册而勵民風此驛固吾良之古蹟
也因成七古一章以紀其事

名教昭垂在朔方天生賢女嫁賢王不幸荒淫遇金主欲營金屋學嬌藏儻使佳人
肯奉詔入宮寵可擅專房那知半世成嘉耦豈與諸姬鬥豔妝但恐登徒心不死變

生不測禍難防就道匆匆辭故國別君寸寸斷柔腸緊束羅襟懷利刃暗藏鳩毒貯
香囊寒雨分飛雙孔雀驚濤衝散兩鴛鴦翠袖單寒悲驛路彩輿倉猝至良鄉孤燈
明滅人俱寂更柝巡環夜未央伏枕心肝慘欲裂沾襟血淚落成行笳拍入胡羞蔡
琰琵琶出塞鄙王牆憶昔英皇曾殉節涕揮斑竹泣瀟湘薄命紅顏拚一死英皇千
古共流芳矢志不教圭有玷癡心空想鳳求凰魂歸濟水三更月夢斷燕郊一夜霜
吁嗟乎南宋諸儒重名節風化流傳澤孔長燕趙悲歌多烈士粉黛嬋娟氣亦剛森
森牆外有古柏勁節應如古柏蒼皎皎窗前照明月寸心可爭明月光欲讀殘碑應
墮淚已埋貞骨尚留香自有賢妃全大節千秋閨閣識綱常

固節驛 四首

前人

后土皇天志可明匆匆到此竟捐生燎岡土石紅如血應是賢妃淚染成 前人
城外鹽川一水清渡川不再赴前程未能投入波中死清白心堪與水盟 前人
但願完貞不願生燈殘人定夜三更今宵殞命君知否聊報多年伉儷情 前人
貞靜幽閒本性生多情至此似無情郵亭一死名千古豈羨他年封后榮 前人

良鄉縣志

卷八藝文志 詩

八二一

琉璃河橋上春望 甲辰年作

副貢 呂蘊華 子勳

長橋建築勝蘆溝一樣前朝舊蹟留官柳兩行隨路植清溪三面抱村流輪蹄絡繹
稱名鎮商賈衝繁集上游最是沿河春景好帆飛篷轉滿汀洲

其二

前人

名山相對峙玲瓏燕谷長虹點綴工帽影鞭絲新霽後風帆沙鳥夕陽中南臨拒馬
濤聲壯北接牝牛水勢雄倚徧石欄凝望久吟懷飛過鐵橋東

琉璃河戰後偶成

前人

意氣相爭各不平畿南百里起連營軍書傍午飛馳急炮火通宵勝負明十室九空
嗟避亂三年兩次慨遭兵至今憑弔琉璃水彷彿猶聞鼓角聲

其二

前人

莽莽乾坤失太和神州空有舊山河人懷往日推恩主誰掃中原混世魔忍使羣黎
齊破產那堪同室屢操戈民心厭亂如斯極未卜蒼天意若何

縣志成喜賦一律東致諸君子兼以志感

縣知事周志中

此間承乏已三年往事如塵劇可憐回首中原爭霸日驚心下邑起烽煙那知兵氣銷融盡又見文章事業傳今讀煌煌新著述千秋不朽羨君賢

良鄉縣志

卷八藝文志 詩

八三

卷七八正誤表

第頁	第行	第字	誤	正
三十一	十六	一	雅	長
三十二	十三	五	徒	徒
三十二	二十	一	車	輛
三十三	一	二	競競	兢兢
三十三	二	八	持	特
三十三	十一	二十三	壓	厭
三十四	十七	二十四	儒	孺
三十五	六	三十一	佺佺	佺佺
三十九	九	五	已	己
四十一	三	十四	接	揆
四十一	六	十一	己	已
四十五	六	七	秋孟	孟秋
五十二	十五	三十二	重	仲
五十三	九	十	競競	兢兢
五十五	二十一	二十六	祠	詞
五十六	十	三十一	綱	網
五十六	二十三	五	字	字
五十七	二	四	離	難
五十七	十一	九	已	己
五十七	二十一	九	之之家	之家
五十八	十一	十八	工	公
五十九	十四	十	司中	司郎中
六十二	二十六	五	廷	庭
六十四	十四	一	高濤	清高
六十七	七	二十七	曲	典
六十八	五	八	冒	胃
七十二	二十二	七	鷹	雁
七十七	三	二十八	迴	廻
八十二	四	八	牆	牆